


谷村文
10-04
工



t 191



762809

永樂大典卷之一萬二千九百二十九

一送

宋

高宗一百七十一

中興聖政草建炎元年五月庚寅上以四方勸進群臣固請即皇帝位于
南京以汪伯彥中興日曆耿延禧中興記參修臣等曰堯舜所以獨高百
 王者以其得天下及其傳天下而知之湯有慚德武未盡善况於後世乎
 漢高帝唐太宗號為盛主然其得天下也以爭其傳天下也幾以致亂大
 哉太祖皇帝之受命與太上皇帝之中興也謳歌獄訟歸而不釋則不得
 已而履大位及夫為天下得人則舉成業授焉不詢群臣不謀卜筮惟視
 天意之所在而已自堯舜以來數千載始有太祖及我太上皇帝豈非希
 闊甚盛之際哉六月甲子詔徽猷閣待制邢煥授觀察使時諫官衛膚敏
 論煥后父不當除待制孟忠厚隆祐太后兄子不當除直學士煥即有是
 命而上以太后故不忍罷忠厚職名於是給事中劉珣中書舍人汪藻引
 故事極論之膚敏改中書舍人言所論不行不敢就職明年正月丁未卒
 授忠厚承宣使且詔后族勿任侍從官著於令以汪伯彥時政記及汪藻



所記參修。臣等曰。臣聞章獻明肅太后垂簾時。外戚馬季良為待制。仁宗親政。於明肅之政。無大變更。獨季良即日易武弁。以為祖宗之制。不可以私恩廢也。太上皇帝奉隆祐太后至矣。而不敢抑言者。以私忠厚。嗚呼。此我宋家法。萬世所當守也。臣是以詳著之。辛亥。赦書拘籍天下神霄宮。貨產錢穀。付轉運司以充省計。先是即位。赦書已罷神霄宮。至是復申論焉。丙午。又詔道士林靈素。鄭知微。傅希烈家貨。令溫處州籍沒。以汪藻所記修入。臣等曰。晉以老莊清言亂天下。車轍既東。而君臣莫知創艾。卒以不振。建炎中興。首黜方士之害。丁寧切至。如救焚拯溺。然非上聖。其孰能之。乃者方士稍稍以附託。干恩澤。特旨冠其徒。至數十人。侵害度牒法。歲給緡錢以千數。而齋醮祈禳。猶不與也。雖間采近臣之議。寢而弗行。然此門要不可啓。臣等敢論著本末。以備覽觀焉。辛巳。詔以知南康軍李定。通判韓琦。便宜誅許亢。特轉一官。先是。臣僚論靖康末。折彥質為宣撫副使。錢蓋為制置使。高亢總兵守河。皆不戰而遁。今置不問。則後何以使人。詔彥質責授散官。昌化軍安置。蓋落職。官觀。高亢編管海外。會南康奏高寓其境。上欲謀變。定琦以便。宜誅之。而待罪。宰相李綱奏曰。淵聖委高亢守河。付以兵甚衆。賊將至而先走。朝廷不能正軍法。而一軍壘守倅。

敢誅之。必健吏也。使後日受命扞賊者。知退走。而郡縣之吏有敢誅之者。其亦少知所戒。是當賞。上曰。然。乃有是命。以李綱時政記修入。臣等曰。古之守封疆者。皆知進未必死於敵。而退必死於法。故援枹而鼓之士。爭致命。以為進猶或生。而退必死也。况受命為大將。任安危成敗之寄者乎。三代聖人。仁民愛物。忠厚惻怛至矣。然其出師不用命者。必戮弗敢赦也。太上皇帝之英斷。後世可忽忘哉。丙戌。詔京東京西河北永興軍淮南江南兩浙荆湖路皆置帥府。要郡次要郡帥府為安撫使。帶馬步軍。都總管。要郡帶兵馬鈐轄。次要郡帶兵馬都監。皆以武臣為之。副。改路分為副總管。路鈐轄為副鈐轄。州鈐轄為副都監。總管鈐轄司。許以便宜行軍馬事。辟置僚屬。依帥臣法。屯兵各有差。遇朝廷起兵。則副總管為帥。副鈐轄都監。各以兵從。聽其節制。正官願行者聽。轉運使副一員隨軍。一員留本路。提點刑獄。彈壓本路盜賊。遇有盜賊。則量敵多寡。出兵會合。以相應援。以李綱時政記修入。臣等曰。昔太祖皇帝監唐末五代方鎮強。王室弱之弊。故削鎮兵。以尊京師。暨我太上皇帝親見靖康以來。群盜充斥。郡邑無備之患。故屯兵諸郡。且責提點刑獄。以警備盜賊。扶偏補弊。可謂各適其時矣。乃者郡邑安於無事。武備寢闕。一有非常。且復蹈前日之害。故臣具述。

其詳以待制詔行焉。十月丁巳，駕自南京登舟，巡幸淮甸。戊辰，宰執登御舟奏事。上曰：「昨日有內侍至自京師，進內府珠玉二囊，朕投之汴水矣。右僕射黃潛善曰：『可惜，有之不必棄，無之不必求。』」上曰：「太古之世，璫玉毀珠，小盜不起，朕甚慕之。庶幾求所以息盜爾。」先是六月丁亥，上諭宰執東京有司發到內庫寶器，有玻璃碼碯之屬，皆遐方異物，內侍陳列以進。朕念玩物喪志，悉命碎之於殿庭。以李綱汪伯彥時政記參修臣等曰：「方承平無事，時陳寶玉飾珠璣以為玩耳。嗚呼！安知是物之足以敗天下而召寇戎也。太上皇帝身履艱難，撥亂中興，其視是物猶蝮蛇鴆毒，肯復親之耶？」碎寶器棄珠玉，臣知出於至誠惻怛，非如唐明皇焚錦繡，姑以飾一時虛譽而止也。十二月丁巳，詔朕側身寅畏，與二三大臣宵旰圖治，罔貴奇玩，罔好畋游，罔昵近習，使干政事，罔有斜封黑勅，以濫名器。夙夜正心持誠，祈天助順，聞小人為姦，或欺誕請屬，以鬻官爵，或臂鷹走犬以事畋獵，而率以御前為名，使朕之好惡何以昭示四方。格于上帝，其令三省樞密院榜諭戒約言事官，覺察彈奏，敢有違者，重寘于法，並許人告。賞錢一千貫。內畋獵之人，輒稱御前鷹犬者，根治得實，配沙門島。以汪藻所記修臣等曰：「春秋之義，王者無外，天下王者家也。善乎諸葛亮之言曰：『宮中

國中當為一體，往者闔寺與姦，臣相表裏，動挾御前之名，以脅制上下，卒成天下之禍。臣讀是詔，至于大息流涕，嗟乎！此建炎紹興之政，所以赫然有祖宗風烈也。建炎二年四月己未，詔惟京畿京東西河北河東陝西，依已降指揮置巡社，餘路悉罷。時杭溫州已就緒，奏乞存留，亦弗聽。以汪藻所記修臣等曰：「唐中葉以後，府衛之制盡廢，至梁湜人為軍，於是兵民遂分。雖以周世宗之善治兵，我太祖太宗之神聖英武，且去唐未遠，而兵民已不可復合矣。治平以來，學士大夫乃始欲追古制而復之，識者固知其難矣。一變而為義勇，再變而為保甲，三變而為巡社，法非不古，而習俗已成，復之無由。此太上皇帝所以不憚改令，以安元元也。庚申，詔御前軍器所見織戰袍工匠發還綾錦院，令依限織進。初命監綾錦院姜渙擇良工就御前軍器所專織戰袍，欲以賜有功將士。中書侍郎張慤等言於上曰：「前日中人因事輒置局，紊亂紀綱，不可不深鑒。今若以織文責綾錦院，而使少府監督其程限，則事歸有司，於體為正。」上曰：「甚善，故有是命。」以汪伯彥時政記修臣等曰：「臣聞明主之察治亂也，審而守法度也，堅寧逆志，拂心弗便於事，而常戒懼於細微孽芽之間，不敢忽也。夫取工於綾錦院，而織袍於軍器所，又以賞功，由常人觀之，誠若無甚害，然太上皇

帝。矍然改令。不俟終日。何哉。官失其守。而事奪於貴臣。法廢其舊。而制出於一切。則亂由之。而作有不難矣。嗚呼。治亂之機。如此其微也。非明主其孰察之。乙丑。上諭宰執曰。昨日有內侍。輒奏曰。比侍講筵。竊聞講讀官某。敷陳甚善。陛下必亦謂然。臣輒撰獎諭詔書。進呈。朕曰。臣僚一時恩禮。當出朕意。非小臣所得預。若降詔書。自有學士。汝等各有職事。豈宜不安分如此。况此詔書。詞既未工。又不知體。取笑外人。上因曰。朕每退朝。過屏風後。押班以下。欲奏事者。朕亦正衣冠。再御座。聽其所陳。未嘗與之款暱。性亦不喜。與婦人久處。多在殿旁閣子。垂簾獨坐。筆硯外。不設長物。靜思軍國合行大事。或省閱四方章奏。左右止留小黃門二人。一執事。一磨門。至於內中掌文書。亦多是前朝老官人。有來奏事者。朕亦出閣子外處。分畢。却入閣子坐。無一日不如是也。以汪伯彥時政記修入。臣等曰。閣寺之禍著矣。佞柔側媚。以狗馬聲色惑其君。禍之小者也。剽略書傳。誦說古今。以才藝自售。則其為禍。豈易測哉。建炎之初。天子厲精求治。而官者技隙肆言。猶敢如此。亦可謂姦人之雄矣。非聖武英斷。絕其萌芽。則基亂胎禍。將何所不至。嗚呼。方其伺顏色。售才藝。能赫然拒絕之。固已難矣。又慕其情狀。告大臣。豈不甚難哉。至於清心寡欲。屏遠聲色。皆中興之本。臣是以

論著之詳焉。七月丁亥。楚州發歸朝官。至行在上。諭宰執曰。聞州郡多囚繫此輩。久者至經歲不得釋。必涉疑似。則殺之。覆燾間。皆吾赤子也。朕欲發諸郡。囚歸朝官。盡赴行在。存撫之。庶幾可召和氣。以汪伯彥時政記修入。臣等曰。古之王者。蓋有殺一不辜而得天下。則弗為者矣。彼姦雄恣酷之言。至曰。寧我負人。嗚呼。人之用心。何止天壤之異哉。方建炎之初。所在盜起。如蝟。窮荒絕漠。狼子野心之人。錯處郡縣。有司為之禁防。或未過也。而太上皇帝。惻然哀矜。形於聖訓。不以防亂備患。而忘濫刑之戒。不以艱危多事。而廢好生之心。凜然有三代王者之遺風矣。是豈秦漢以來。所能髣髴哉。八月癸丑。臣僚請復常平官。講補助之政。廣儲蓄之具。從之。十月壬戌。詔常平之法。歲久多弊。頃以紹述為名。雖知有公私不便。當增損更易者。亦莫敢言。今止為常平本法。所繫甚大。非他司兼領。故復置提舉官。尚慮蹈襲前弊。反致害民。可明諭天下。青苗散斂法。永勿復行。其餘條制。令葉夢得。孫覿。張徵。討論以聞。以汪伯彥時政記。及汪藻所記。參修。臣等曰。常平之法。尚矣。穀賤則糶。穀貴則糴。無散斂之煩。而有救災之實。公私俱便。農末皆利。天下之良法也。孟子譏狗彘食人食。而不知檢塗。有餓莩。而不知發。使孟子而為政於天下。常平之法。必在所取矣。彼青苗

出於近世。蓋非常平之舊。建炎之初。廢青苗以利民。而有司奉行失指。至
侵耗常平之積。此詔書所以丁寧繼下也。今官存而事寔弛。法具而吏費
虔。意者朝廷仁愛之心雖至。而責實之政尚寬歟。臣故著初詔于篇。願有
稽焉。乙亥。上御殿策進士。九月庚寅。賜李易等及第出身。初有
司欲以上十人所對策進呈。且請以上意定名次。上却之曰。朕委主司取
士。必不錯。乃悉從所擬。不復更易。以注伯考時政記。及注藻所記。參修臣
等。恭惟太上皇帝。當建炎之初。策士于廷。一委主司。不以一人之好惡為
之升黜。天下之至公也。及紹興中。權臣罔上。假國家之科目。以私其子弟
親戚。則聖斷赫然。拔寒畯。抑權貴。亦天下之至公也。惟一出於至公。故靜
則為天地之度。動則為神明之斷。傳曰。公生明。太上皇帝實有焉。建炎
三年三月辛巳。臣僚上言。宜倣唐制。及祖宗舊制。應章奏。委翰林學士。給
事中。中書舍人。輪日於禁中。看詳條陳具奏。使是非與奪。盡從公論。左右
小臣。不得妄言利害。既委臣僚。乞不差內。臣轉送。只實封往復。庶免黨與
交結之弊。詔從之。以路允迪時政記條入。臣等曰。人主親決天下事。而不
以假臣下。未為甚害也。然天下之亂。往往輒生於此。秦始皇。隋文帝。唐德
宗。皆是聰明過人。無待輔助。於是踈間群臣。厭忽公論。而不知近習小人。

已陰竊其柄矣。太上皇帝深鑒前代之禍。博采在廷之議。以看詳章奏。專
責儒臣。使左右小臣。無所投其隙。防微杜漸。至矣。今天子即位之初。首詔
兩省。分閱公車之奏。條流來上。實遵建炎故事也。聖聖相繼。出於一道。蓋
多類此。嗚呼。盛矣。四月乙卯。赦書。仁宗皇帝在位四十餘年。恩結民心。
社稷長久。應仁宗法度。理合舉行。元祐大臣。雖累降處分。盡還官職。恩數
尚慮未盡。霑恩。其令本家自陳。有司疾速施行。先是元年六月。赦書。舊係
籍及上書人。悉還其元任官職。及贈謚碑額等。至是復申救焉。臣等曰。臣
竊觀三代以來。風俗忠厚。莫若我宋。世世修德。澤被天下。最久莫若仁宗
皇帝。比太上皇帝。所以慨然發德音也。天監在上。克相聖志。海內乂安。年
穀屢豐。於萬斯年。無疆維休。則亦躬享仁宗黃耇之福。可謂盛矣。元祐大
臣。勲德相望。中更黨錮之禍。其死於紹聖崇寧之前者。嘗被恩數。固可還
之矣。其間不幸沒於謫籍之後者。謚所以易名。而或未盡議。贈官所以念
功。而或未盡舉。碑額所以旌賢。而或未盡賜。意者太上皇帝之心。將以啓
迪嗣聖。故略而未行。以俟今日歟。此議。即博士之責也。五月辛巳。巡幸
次鎮江府。上謂宰相呂頤浩等曰。張愨。古之遺直。陳東。誅死。可念二人。皆
葬郡境。已降親札。令有司致祭。卿等更議。卹其家。祭未。中書舍人張恂。被

旨引對。甲申。上謂順浩等曰。張恣謂朕即位以來。無纖毫之失。自古人君。不患無過。患不能改過耳。恣諂諛如此。豈可寘之從班。可黜之。於是詔恣落職。官觀。以呂頤浩張浚時政記。汪藻所記參脩。臣等曰。武王克商。有下車而為之者。有未及下車而為之者。建炎中。太上皇帝。櫛風沐雨。日不暇給。而汲汲於褒忠。直去佞諛。辛壬癸甲。未越信宿。聖政可以傳後世者三馬。抑可謂明所先後矣。然臣伏觀是時。上方勵精政事。躬行勤儉。張恣稱述。以為無纖毫之失。亦未為甚過也。而聖斷赫然。屏遠斥絕之。惟恐少緩。臣知欺罔譏匿之姦。固無所容矣。是誠中興之本也。丙戌。詔曰。建康之地。古稱名都。既前代創業之方。又仁祖興王之國。朕本繇代邸。光膺寶圖。載惟藩潛之名。實符建啓之義。蓋天人之允屬。况形勝之具存。典邦正議。於宏規。繼夏不失於舊物。其令父老。再覩漢官之儀。亦冀士夫。無作楚囚之泣。江寧府可改為建康府。其節鎮舊號如故。臣等曰。建炎初載。重違汴都父老之意。是以車駕所臨。止曰巡幸。示不忍去故都耳。然自古未有為國數十年而無定都者。江左之必居建業。猶中原之必居雍雒。天造地設。無可更議矣。王師北討。非盡復燕趙并代。雖得河南。未可以舍建業而北也。自古披草萊。立都邑。不數年。遂致富盛者多矣。况經營如是之久乎。臣

故具載初詔。冀天子有感焉。八月戊申。上曰。昨日吳國長公主入內。以畫及小玉山玉管筆為獻。朕對以平生不識畫。因而不好。長主可惜錢。買此。遂并玉山等復還之。以王綯時政記脩入。臣等曰。昔宋高祖未備音樂。湯仲文以為言。帝曰。日不暇給。且所不解。仲文曰。屢聽自然。解之。帝曰。政以解則好之。故不習爾。蓋耳目之玩。解生於好。好生於解。惟澹然清靜。則物莫能入。太上皇帝。體堯蹈舜。固非區區宋高祖所能仰望。然其言有適用者。臣是以著之。以見開國治謀之君。躬履艱難。崇尚儉約。大抵皆如此也。閏八月丙戌。上與宰執論借補官資之弊。曰。三十年來。爵秩冒濫。日甚。一日政和宣和。則以應奉花石之類。補授官爵。遂輕。自宣和末以來。軍興借補。猥冗不可勝計。小使臣關止二萬餘。今借補者。何啻三五十萬。將來事平。未知何以處之。以王綯時政記脩入。臣等曰。借補猶前代假版之類爾。雖甚冗濫。一旦朝廷澄清之。猶可為也。而太上皇帝。已慮之如此。乃者軍興賞功。至五十萬有奇。往往買亂相乘。又皆真命一子。不可復奪。天子雖當宁太息。思有以革其弊。而有司安常習故。終未能仰承上意也。臣誠竊憂之。敢論著于篇。以備省覽。丙申。主管頌遞官。奏巡幸日迫。爨竈器皿不備。請惟給衛士蒸餲熟猪肉。上曰。今來巡幸。豈可搔擾。如朕昨勿

邊渡江。被褥亦不以自隨。偶攜得一貂皮披卧蓋各半。未嘗取索一物。而有司借湯瓶至四百枚。不知何用。只今可出黃榜告諭。所過州縣。除蒸餬外。皆勿供。如違。當重寘之法。以王綯時政記修入。臣等曰。前代當多故時。人主務行姑息之政。往往反以階亂。獨太上皇帝神武英睿。深鑒茲弊。以為人主猶暴衣露蓋。蒙犯霜露。宿衛之士。得飽餅餌多矣。其可重困吾民哉。故戎寇雖深。而軍律愈整。艱危雖極。而民心不離。卒以中興大業。垂裕萬世聖矣。夫游被命修光堯皇帝聖政草創九例。網羅放逸。雖寢食間未嘗置也。然不敢以橐留私篋。暇日偶追記得此命。兒輩錄之。隆興二年十月一日。左通直郎通判鎮江軍府事陸游記。周益公紹興辛巳親征錄。紹興三十一年。歲在辛巳。十月辛丑朔陰。手詔金虜叛盟將親征。其文洪景盧所草。前一月人己能誦之。癸卯雨。除三招討使吳璘報九月十八日。遣將彭清劫金人大寨於寶鷄橋。知均州武鉅奏。招到北界杜海。皆朝等二萬餘人。老小數萬口。獲首生擒二百餘人。池州都統李顯忠奏。與金人三戰於正陽西。敗之。此月三日也。時虜騎已縛橋踰淮。吳璘奏九月二十七日。克秦州。戊午。晴。張真甫供職。葉義問督視江淮荆襄軍馬。虞允文參謀軍事。義問辟洪邁馮方同行。時虜騎大入。諸將多敗奔也。庚申陰

晴相半。聞王權與金人戰于和州境。人情大洶。辛酉午後。出北關送葉樞。矜氣大言。識者憂之。行府犒軍金帛。絡繹于道。邵宏淵黃旗走報。與金人戰于六合。先是諸將每遇敵。輒以捷告。都人望旗呼舞。尚書省揭黃榜於通衢。不移刻。摹印徧都下。驗其地。則皆自北而南。實未嘗有所獲也。壬戌。聞虜陷真州。邵宏淵雖力戰於六合。兵少不能禦。故也。甲子。陰。聞虜陷揚州。百官宅遣徙一空。十一月己巳朔。霜晴。人情稍舒。劉錡報阜角林大捷。先是錡提軍駐淮東清河口。與虜兵相持。而元顏亮親率大軍別從淮西入寇。李顯忠遇之。即遁。遂與王權戰于廬。于和權退舍。屢敗。亮自滁入真。邵宏淵又不能當。亮兵將繞出錡後。錡知不敵。即捨清河。歸維揚。焚廬舍芻糧。南歸。虜遂兩道入矣。亮至阜角林。錡與戰。敗之。捷書聞。上大嘉。遣中使賜與甚厚。丙子。聞此月五日。李橫敗績於瓜洲。初。劉錡既捷。即卧病。輿歸京口。虜遂臨江。葉義問督錡進戰。錡不可。亦以病。實不能行。義問乃命橫將兵過江。方交鋒。虜分兵為左右翼。潛出橫後。夾攻我師。橫大敗。諸軍赴江。死者甚眾。凡犒軍金帛。盡為虜得。橫亡。失都統印。匿草間。獲免。或云是日中軍將劉記臨陳先遁。故敗。記錡之姪也。庚辰。采石捷書聞。初虜兵雖勝。視瓜洲江闊難渡。而采石淺狹。且朝廷方以李顯忠代

王權統金陵之師。亮意其號令未定也。以此月八日九日。親執旗鼓。督細軍臨江而聚。所掠之舟。密載甲士南渡。會漁人謀知其期。走白顯忠及虞允文。亟命舟師逆之。虜舟雜以木筏。又其人不習水。我以戰艦乘風衝擊。賊兵皆溺死。亦有數百人。已登南岸者。允文激勵士卒。殊死鬪。盡殺之。不然幾殆。辛巳。聞采石北師稍稍引去。乙酉。聞北師聚於淮東。真揚間。甲午。武鉅報克鄧州外城。王彥報師次長安外邑。大抵諸軍時時以小捷聞。而淮上益急。十二月己亥朔。同舍皆至政府。自午至酉。方出堂。先是。邊報稍緩。宰執皆早歸。一遇警急。往往晚出。張真父戲云。欲知敵情。但視堂。又軍興以來。陰雨連綿。天氣愁沮。間值晴霽。必傳捷音。同舍又戲云。欲占凶吉。請視日。庚子。晴。鎮江諸帥報元頽亮為其下所戕。亮之將敗盟也。得浙匠教之航海。於是大興工役。造巨舟於膠西。刷河北壯丁。雜以金人。謂之大漢軍。命蘇尚書者為之帥。其謀為我以大兵踰淮逼江。中國必悉師來拒錢塘。禁衛空虛。則樓船可擣腹心。腹心震駭。雖抽江上援兵。亦已無及。然後可以得志。其部分計畫。皆有成說。乃命張忠彥。堅壁鳳翔。以弊吳璘。又命劉夢攻擾襄漢。而亮自率精銳及簽軍。號數十萬。由淮東西兩道入。既未能渡江。則駐師維揚。日望海道。如約。無何。朝廷遣李寶

或云。劉錡預謀。率防海之舟。先過山東。將次膠西。禱神祠。遇順風。又得謀者。用其言。衝虜舟。舟既大而簽軍及女真。不習戰。束手敗降。寶縱火焚數十艘而歸。亮聞大怒。暴戾益甚。殺戮無常。人人惴恐。葛王者。知其可圖也。遣親信結帳下兵。殺亮。會亮親兵別攻泰州。左右無助。乃以冬至夜作亂。亮驚起。為攢箭所殺。食罷。同舍相率慶。二揆楊參。黃樞首揆。有還白溝之語。夜鏢學士院。何道遠疾眩在假。劉共甫時暫攝直。辛丑。文德殿宣麻。李寶。自右武大夫宣州觀察使。提督海船。拜靖海軍節度使。充浙東西路通泰海州沿海制置使。京東路招討使。賞膠西之功也。聖旨已降。指揮巡幸視師。可用十二月十日。進發。黃樞云。今早得報。十一月晦。虜兵陷秦州。剽剔老幼。俘掠少壯。極其慘酷。即亮所遣親兵也。或謂左右與葛王通謀。故說亮遣之。壬寅。金國大都督府牒。國朝太祖皇帝。創業開基。有天下。迄今四十餘年。其間講信修睦。兵革寢息。百姓安業。不意正隆失德。師出無名。使兩國生靈。皆被塗炭。今奉新天子命詔。已從廢殞。大臣將帥。方議班師。赴國。各宜戢兵。以敦舊好。須議移牒。牒具如前。牒宋國三省樞密院。照驗。大定元年十一月三十日。丁未。王彥報收復華州。戊申。大雨。巽時。上披氈裘。乘馬出北關門。宰執建王以下。皆紫衫從駕。至稅亭。御船

進發留司百官班辭于東倉以泥濘免拜隨駕官宰執皆行後省金按節
劉珙諫院梁仲敏宰屬徐度六部長貳凌景夏張運御史臺吳芾陳良祐
卿監王普史浩郎官曾注余時言薛良朋馬騏姚寬一官率兼數職餘不
書已酉雨不止留守相公視事於都堂徙居於執政府職事官皆上謁
庚戌午後雨稍止王彥報收復陝州甲寅聞車駕十四日次平江十
五日歇泊今日進發丙辰陰聞樞密行府限五日結局虜兵萬餘尚留
和州李顯忠禦之辛酉雨聞車駕二十日次鎮江未有進發之日初虜
之殘兵屯和州鷄籠山李顯忠攻之不克亡失兩將虜兵緩轡徐歸顯忠
躡其後而不敢逼久之方出境丙寅聞赦新復州軍紹興三十二年
歲在壬午正月戊辰朔車馬在鎮江太史局奏未時太陽交蝕甚於申復
於酉雨不止無所見守局如式庚午晴聞歲旦鎮江日蝕五分又聞德
音赦淮南京西殘破州軍壬申陰陳宗卿置酒省中聞車駕此月三日
發鎮江丁丑吳玘等報十二月十二日收復汝州武鉅報十四日復嵩
州已卯武鉅報十二月九日義兵復西京又聞王師復壽春府其實入
空城而已虜兵至則又棄之丙戌聞有旨班進討之師糧運不繼且疫
癘大作也戊子聞有旨二月六日回蹕癸巳聞北虜遣使告即位二

十三日聖旨差洪邁張掄克接伴使副邁借左朝議大夫試尚書禮部侍
郎二月癸卯駕離金陵丙午發鎮江丁未太尉劉錡薨乙卯五
更出餘杭門五里迎御舟丙辰丁巳戊午歇泊假己未文武百僚詣
後殿問聖體乙丑幹辦諸軍審計司嚴致明云常歲除川陝外諸軍支
春衣二十四萬餘疋今春止二十一萬餘疋蓋自去冬用師開落三萬而
隱冒不預焉著作佐郎張震權倉部郎官云行在百司及內人月支米十
四萬餘石內外諸軍歲支米四百餘萬石三月庚子聖旨扈從及隨逐
一行官吏軍兵依紹興四年扈從至平江府例並特與轉一官資餘人犒
設一次樞密行府官吏軍兵諸色人依此推賞癸卯吳璘報逐金人至
寶鷄盡得關險樞密院編修官鄭樵卒字愚仲興化軍人力學著書不為
文章不事科舉屢至闕下游諸公間二十八年講筵官王綸等薦對特補
右迪功郎主管架閣庫御史葉義問論其過失改監南嶽廟給札歸抄所
撰通志三十一年夢其書來得樞密院編修官請修壯虜正隆官制比附
中國秩序因求入秘書省繕閱書籍未幾又坐言者寢其事至是欲進通
志而病病數日卒年五十九樵好為考證倫類之學成書雖多大抵博而
寡要平生甘枯淡樂施予獨切切於仕進識者以是少之壬子北使高

忠建張景山入見前此三節人乘馬入麗正門至是令就門外下馬喧爭甚久既而使者捧國書上殿知閣門事趙述以祖宗舊例跪受之使者守近例不與述老矣相持移時仆于地上目二相陳康伯進曰臣等位宰相不當受其書請改用他日行禮又呼館伴責曰前日已議定用在京禮例今乃紊煩聖聽何也徐壽懼不能對時北使方秉笏寘書兩臂間壽從旁掣以進國書略曰十二月日大金皇帝致書于宋帝粵自皇統以來修好不絕不意正隆之末師出無名且有歸兩淮敦舊好之語癸丑蜀中報閏月二十五日姚仲吳挺敗虜師乙卯洪邁借翰苑經筵同張掄克賀大金登寶位國信使副丁巳北使辭答書畧曰淮甸侵疆幸先期而克復祖宗故地方遣使以請求戊午北使出門太常少卿王普帶御器械王謙送伴成閔自淮東來朝閔之留荆襄也虜正窺采石瓜洲朝廷屢以金字牌趣閔解圍閔聲言擣陳蔡其實畏避既而日馳百餘里士卒凍餒而死者十二三至有自經於樹者虜退方進攻宿亳亦復無功至是歸闕懼人之議已凡郎官而上皆有苞苴冀以自解云己未洪景盧出接伴雜錄云淮泗間彌望無寸木鵲巢平地又云道逢泰州民自虜中逃歸言初被驅迫至京畿百姓爭舍匿之調護甚至仍為治裝告以歸路有捨其

馬使代步者惟過河則不可回四月戊辰皇孫女永嘉郡主薨年十四初本瘡疹候而醫者誤投藥有旨送棘寺庚午釋衆醫朱邱奏請也

辛未上為永嘉郡主輟視朝聞泛使禮物例用金器二千兩銀器二萬兩合十具腦子龍涎心字香丁香各二合之類匹物二千綿襪金線紫線茸

背以上各二百線羅縐蒲縷清絲綾已上各四百朝士言三月十七日得

旨許高麗遣使來賀恢復疆土蓋綱首徐德榮為鄉導而明守韓仲通為請於朝衆論不以為然會浙東提刑樊光遠畫七不可之說其議遂閣洪州言三月二十一日資政殿學士魏良臣卒良臣字道弼金陵人登進士第調丹徒尉移遂昌令召為勅令所刪定官擢尚書郎北虜遣二太子將兵薄淮韓世忠戰不利呂頤浩薦魏良臣往使時方與同舍郎觀潮得檄納筭中卒飲乃起人頗危其行良臣亦作遺令付其家晚不幸持以白父母行至楚州見世忠道使指世忠下令斷浮橋命無得以一騎踰淮良臣馳扣虜營其副將聶耳李董有和意勅吏授館待使者無何世忠謀知虜已弛備輕兵渡水擊其後軍殺傷甚衆聶耳大怒謂良臣賣已虜衆倅斬之良臣大呼曰某親老妻子幼弱誠知邊將不恤國計僥倖一旦功何苦蹈萬死來見將軍哉聶耳稍悟命韜劔驅良臣行數十里抵主帥帳前卒

許和遣良臣歸報。會順浩罷相。趙鼎主戰。良臣請祠去。久之。召拜左司員外郎。進檢正。擢吏部侍郎。兀朮寇邊。邀結好。詔良臣與王公亮議之。虜欲斥地盡江。歲遺匹兩。皆五十萬。良臣曰。被命以淮為界。非江也。兀朮陽諾而答書云。使者許我江北矣。良臣私發其封。大驚。明日。勞入。詰兀朮背約。兀朮辭窮。為取璽紙。易書和議。自此始定。俄坐臺劾。與近習暱。出知廬州。徙池州。復敷文閣待制。進直學士。秦檜任事久。士大夫異己者。徙相望。良臣遺檜書曰。天有雷霆。尚隨之以雨露。欲勝天乎。願為子孫計。毋貽後悔也。檜死。御批。召陳誠之及良臣等四人。良臣先至。遂拜參知政事。紹興二十五年十二月也。良臣既驟當大任。銳意更庶事。稍裁諸將回易之弊。發三省堂厨官賈瑜罪流之人。頗畏懾。然學術空疎。舉措多輕佻。內外譖誚。不三月。罷為資政殿學士。知紹興府。內侍鄧友護。殯官干擾府縣。良臣撻其盜伐禁地林木。械送行在。詔貸死決配。人頗服其果。未幾。提舉洞霄宮。起知宣州。徙潭州。洪州。所至。治盜甚刻。洪州之政尤暴率。卒年六十九。五月丁未。梁仲敏。蔡寺丞。沈子平。相訪。蔡乃君謨曾孫。陳亞嘗有蔡襄無口便成衰之戲。自是子孫立名。多連口字。惟子平從之。壬子。五更至漏舍。平明入麗正門。宰執親王使相侍從。臺諫兩省官禮官並詣射殿立班。

辰時八刻。皇帝自御幄出。再拜升殿。奠酌顯仁皇后神御前。沾灑久之。在廷泫然。神御出麗正門。皇帝奉辭。宰執至禮官皆騎導。赴景靈宮。文武百官奉迎於宮門。騎導官步導。赴後殿。未時八刻。再立班。行奉安禮。左僕射陳康伯充禮儀使。是日天氣甚涼。初出麗正門。細仗布列。鼓吹振作。眾馬驚跳。戶部汪侍郎方跨鞍而墜。腰臂皆損。癸丑。歇泊假欽宗小祥前。輔臣至。權侍郎以上。赴几筵。殿行奠酌禮。以明日樞密院罷散。天申節道場。故前期入奠。甲寅。有旨。張浚專一措置兩淮事務。兼節制淮東西。建康鎮江府。池州。軍馬。丙辰。張子蓋。李寶。連報海州圍解。虜兵敗走。國信使副以十六日到虹縣。金國接伴使工部侍郎龐副使。祕書少監。已先在遣人致問云。不須傳衙。便請過界。丁巳。天申節故事。當拜表賀。有旨。免百官晨赴明慶寺。望闕立班。再拜賜香。口宣再拜訖。又再拜。首相以謝表授中使回奏。頌之。再追班滿散。祝聖壽道場。臺吏引予立香案側。謂之監香。甲子。未後。御筆手詔。朕以不德。躬履艱難。荷天地祖宗垂佑之休。獲安大位。三十有六年。憂勞萬幾。宵旰靡怠。屬時多故。未能雍容釋負。退養壽康。今邊鄙粗寧。可遂如志。而皇子瑋。毓德允成。神器有託。朕心庶幾。馬可立為皇太子。仍改名。初用燁字。或謂近唐昭宗名。有旨。別擬定。所司擇日。

備禮冊命其宮室官屬儀物制度等疾速討論典故以聞詔自內出外廷不知也。自去歲修秦檜舊府貴近密語人云。上欲行唐堯故事。尋以違事而止。今春工役甚急。外議籍籍。四月末。新除侍御史呂廣問以陳康伯姻嫌。改除禮侍康伯因求去。上始露倦勤之意云。朕年老多病。皇子將四十。可付社稷。徑欲行內禪禮。他日近臣奏云。事當有漸。無令四方或致驚駭。上曰。朕未思此也。故先下立儲之詔。而意指已見。或謂此即初製傳位詔云。六月戊辰。殿院張真父上殿擊朱揆。仍納副本。倬自拜相。即地震。且立朝專務迎合。中外雜然譏訕。臺諫欲論列而上眷至厚。非有大惡。勢不能去。五月間。倬聞內禪有定議。語其子端厚。端厚遽令幹辦府以狀申太府寺去。其本國學生去秋誤作白身奏。補承事郎。乞批料錢曆為證。會有密告臺諫者。以謂國學生與白身。初不繫入官利害。蓋臆料將來覃恩國學職事。及得解人或可免省。而倬在相位可主此議。又懼人之知也。故不於吏禮部而言之。太府但欲取官文書照使爾。彈文專指此事。并面奏大臣懷姦覬幸。非常不可恕。上聞之變色。辛未。御營宿衛使楊存中。保明扈衛統制將佐使臣軍兵等四萬三百五十二人。四月六月。奉旨諸班直等三百三十四人。并諸軍扈衛官兵二萬九千七百三十二人。各特與轉

一官資。出戍暴露。并扈衛官兵二萬九千七百三十二人。各特與轉兩官資。今日報臺見之。癸酉。侍從臺諫禮官就御史臺集議。故宗室子倬。并妻加封事。初朝士有以子倬恩數白宰相者。宰相難之。既而冒昧進呈。上遽曰。他日誠難處置。今了却甚善。尋有旨。皇太子所生父子倬。贈秀王。追謚安僖。中書舍人唐文若既書黃。疑其未安。急白宰相。別取旨。改稱皇太子本生之親。俄又收回制書。而降旨云。故宗室子倬。并妻。合行加封。今禮官侍從臺諫。檢照典故。討論聞奏。於是諸公做濮王之議。請極其官爵。使後無以加。且服屬雖絕。當從權冠以皇兄二字。庶免著姓。惟徐敷立。汪聖錫。呂仁甫。堅欲稱宗室。予與辯論久之。乃肯書奏。是日奉旨。子倬。贈太師中書令。追封秀王。謚安僖。元係左朝奉大夫。克祕閣修撰。妻加封秀王夫人。而制中加皇兄二字。甲戌。皇太子賜字元永。宰臣率百官詣文德殿拜表。賀立儲。翰林學士洪遵等十六人。以皇太子正位東宮。告廟了畢。同班上殿稱賀。實欲致戀軒之意。上曰。朕在位失德甚多。更賴卿等掩覆。真父仲誠同對。促罷朱揆。上曰。即有處分。卿等皆公論也。乙亥。旬假。宣麻。朱倬罷右僕射。時內禪日逼。宰執請止降告。上不欲廢故事。故就假日。殿院張真父之具藁也。察官周元特獨未知。一日云。某昨夜夢朱相衰服還

鄉。且以棺自隨。此何祥也。真父驚異。具言之。解之者曰。衰服者。白身也。端厚正白身事。故為此舉。其以棺自隨。殆能終保觀文乎。暨告廷。果除觀文殿學士提舉。在外官觀。臺諫文章乞褫職。皆不報。昨日劉共甫當直。以嘗為倖薦。在假規免。丙子。五更至待漏院。平明正殿設仗。上坐。雨稍止。禁衛閣門三衛文武百官。以次起居。宰執上殿奏事訖。駕興。班退。頃之。復追班。序立殿門上。閣門官南向宣詔曰。皇太子。可即皇帝位。朕稱太上皇帝。退處德壽宮。皇后稱太上皇后。云云。百官拜舞訖。入詣殿下立班。皇太子即位。流涕久之。側立拱手。群臣拜舞稱賀。內侍固請坐御榻。不許。禮畢。宰執奏事。皇帝亦立聽。班退。雨復作。太上皇帝自祥曦殿。乘道遙車。幸德壽宮。儀衛及從。駕臣寮。並如常制。百司就幕次起居。太上皇后相繼出。陳德召司業云。某在宗寺見玉牒載。紹興初。今上皇帝初入宮。宰執贊太上聖德。真堯舜用心。太上曰。堯舜之事。甚不難。則脫蹠之意。蓋素定於當日矣。丁丑。大雨。駕詣德壽宮。繳扇皆止。宮門外。百官班迎。泥淖沒膝。不能成列。初定議。注。皇帝率百官朝謁太上。既而詔百官免入。俄有旨。從駕臣僚亦不入。但就宮中行家人禮。昨日上欲從太上過宮。大臣議不同而止。侍從官赴都堂議。赦。初定太學。止免職事。人文解。御批在籍皆免。非故事也。

中興備覽議征伐。孟子曰。征之為言正也。各欲正己也。焉用戰。蓋在己者不正。則無以得天下之心。作天下之氣。臣願陛下強勉修德。先正其身。夫左右前後之人。犯顏拂意。惟善是言。則陛下聞見益廣。聖德日新。左右前後之人。孫志順旨。求悅聖心。則陛下過失益著。聖德日衰。天下從違。自此分矣。况兩宮遠狩四方。困窮所責。望于陛下者如何耶。惟陛下戒之。謹之。無謂其細故而忽也。斥去邪佞。登崇善良。以福四海。以隆社稷。議用兵。用兵之道。貴在專一。心有所主。不憂中制。則雖敗而能勝。雖弱而能強。自古見於行事。此類非一也。若夫號令改易。進退猶豫。則未戰而先敗矣。臣曩為富平之舉。不能擇將而任之。紛紛然徒事約束。是以終至於敗。今日之事。朝廷當以為戒也。議駕御將帥。論者謂人主之御將。當結之以恩。待之以禮。此固是也。然臣竊以為。服將帥之心。莫若一循理道。而加以至誠。則何事不濟。若一有不歸於正。彼雖遜順伏從。而其心已窺測。懷望矣。唐自肅宗之後。藩鎮跋扈。終至於亡。豈非有以啓其心者乎。議親近之人。臣竊惟人主之尊。譬如北辰。不動於上。而衆星拱之。是以聖人治天下。必謹選左右。親近賢良。以輔成其德。嗚呼。見君者。非齋戒沐浴。恭獻善言。則不敢輕進馬。若使小人。或得以肆其市井之說。是為瀆尊矣。

至於詢之蕩莠以問利害。茲又無不可者。議君子小人。朋黨之論起。而君子小人之名。紛然交作。莫知其孰是孰非。自古患之矣。夫志在天下。國家。此君子也。志在一身。此小人也。然而託君子之言。行小人之志。其事甚微。其情難辨。人主當留意焉。然自昔帝王之用心。惡聞人之有過。而喜人之改過。其小人也。特使之退。聽自省而已。幸而改過。猶復用之於外。馬若必曰。某為君子。某為小人。一二別之。又未知真能辨之否也。加人以不善之名。則人必報之以至惡之實。朋黨交頌。端自此始。然則人主宜如何哉。知之于心。待之以權。使上下內外各當其分。真為小人者。方且化而遷矣。使其言者之誤。而吾未嘗以此名加之。人心豈不悅服乎。議姑息。儒者拘於古義。惟知薄賦省用。可以得天下之心。而不知排大難。除大患。權一時之宜。救四海之急。其用心非不本於仁。取之於民。有不得已者。且愛民而姑息之。一旦有急。不能保護。使之父子流離。生事委棄。安在其為仁也。况兩官未歸。中原僕望。天下之心。所以責望於我者。至重乎。雖然。兵興之久。生民憔悴。益甚矣。陛下勉之。寸陰是惜。至誠有為。以惠天下。臣請以死効力焉。議間諜。自古用兵。莫先於料敵。而間諜之發。本以為之輔耳。故能察見虛實。分別情偽。莫有失者。若夫今日。聞某處聚兵。即發兵

以應之。明日又聞某處聚糧。即又發兵而應之。是惑於聞聽。而常制命於敵矣。臣願異時邊警有急。當先料之於心。無或輕出號令。則失誤鮮矣。議指揮諸軍。號令出於一。則令嚴而事有所濟。使臣行事於外。而朝廷異論於內。則上下觀望。鮮能成事也。議固結人心。臣嘗謂方天下無事之時。君臣上下之分。其勢足以相維。雖人君不能修治其身。及繩正其左右。以失天下之心。其為禍也尚遲。乃若艱難多故。敵情不測。人心易怨。君人者儻有差失。禍亂不旋踵而作矣。大勢一去。不可復合。無以微而忽之。幸也。議名器。論者曰。方今名器猥濫。宜有以更張而貴重之。此意誠是也。然臣嘗觀漢高祖有天下。起於匹夫。分土列爵。以收天下之豪俊。而卒成帝業。其後光武中興。布衣之交。並列三公。小大功臣。以千百計。豈有他哉。定天下之大難。救百姓之塗炭。非有以振動鼓作之。未易得其死力也。夫賞幸予私。徇情納賄。此可為名器之濫。至於激厲將士。摠攬英豪。寧失之過。方今逆豫。盜有中原。神人共憤。彼方且假吾爵祿。以欺詐其下。在我者當如何耶。議分別邪正。方今士大夫之賢者。莫不欲主張清議。發明正道。以為萬世人臣之戒。誠以有天下國家。要在夫得人。以維持之。故忠義大節。不可不明。苟使持祿保身。隨時俯仰者。得行其志。則馮道

之徒。復見於後日矣。豈人主之利耶。然臣嘗謂天下自有要道。隨時舉措。則盡得天下之心。而致治不難也。且圍城之役。明受之變。當時從邦昌而為侍從。徇苗傅而有所施為。其罪固大。厥後乃繼踵作相。持握化權。果何以勸忠義。示風俗耶。若夫論者必欲正其罪而暴白之。則又失中矣。何者。士大夫之不能死節義。則無所不為。而死者人之所甚難。未可人人而責之也。今正名其罪。則有過者無以自新。非其本心者無以自見。附偽之人。知其無所逃於天地之間。將與我為死敵矣。非國家之善計也。臣願陛下戒忠義之不可不勸。思有以發揚而榮顯其身。至於不幸而得罪於名教。則亦優容涵覆。特遠而去之。不委以心腹之任。則取天下。定國家。明教化之術。盡於此矣。議彈擊。自昔為臺諫之臣者。通曉古今。深明治道。其弛張獻替。莫不以天下國家為念。嘗考其所言。輕重緩急。皆有條理。於姦人之有才者。則必力排而極詆之。惟恐其言之不切。論之不詳。非有心於甚惡之也。謂不如是。則彼之姦計得以行。彼之才術得以施。將為天下國家之害矣。至於人材平下。政事差失。姑擊之使退。未嘗以陰昧之事。切切然深指之。使其人幸而悔悟。尚可以為朝廷之用。不為無補也。乃若宗工巨儒。功在社稷。則初不以末節細故而輕議其失。蓋欲使四夷八蠻。知有

是人。斯足以增朝廷之氣。近世進用非人。皆失此意。臣獨願陛下掩人之過。成人之美。則孰不歸心而樂為吾用也。議任人。臣竊惟自昔人君。於內外侍從之臣。間有深知其所為者。往往自為我之聰明才智。足以制御而役使之。而不知事有緩急。理有不虞。臧伏竊發。為國家大患。由辨之不早。去之不速也。可不戒哉。議撫恤侍衛之人。臣嘗為人君高拱於一堂之上。其於天下百姓。內外士卒。安能徧撫而盡恤之哉。則亦推至誠之心。自近以及遠而已。今有人於此。無故而陵侮毀辱其類。則天下識與不識。莫不深惡之者。此無他。人情本於一故也。是故推至誠之道。以待遇左右爪牙之士。則孰不悅服而歸心。一人傳之十。十人傳之百。以千以萬。莫不皆然。臣願陛下稽祖宗之法。撫恤衛士。問其疾苦。知其嫁娶時其飲食。教其事藝。使適其中。不必拘以常制。則天下之凡為將士者。莫不知所自勉。而樂為陛下用矣。議堂吏。或者謂堂吏員冗。而俸給優厚。宜有以裁制之。臣竊以為養之不厚。無以責其廉。但當督責戒約。使不為過可矣。彼其間固有棄父母生事而從陛下者。汰之澄之。其在異日乎。議軍器。臣嘗謂軍器之積。數不厭多。或者乃以大軍器用足備。不為之計。而不知虛養兵卒。所費更廣。緩急闕乏。非旬月可辨也。議民兵。臣竊謂

往歲巡社之舉。無益於禦寇。祇以召亂。而况東南之人。其不可為兵也明矣。一發其端。為害甚大。不可不審。議諸州兵官。臣竊惟方今人材之豪傑者。悉皆從軍郡邑。兵官未易得人。當徐徐改易。庶不至駭人耳目也。議宣政人才。臣嘗謂宣政之間。內外用事之臣。固有得罪于天下。或專事應奉。或興造土木。或留意花石。或搜求玩好。此類甚多。天下之人。憤怨久矣。今若復用之於內。彼雖循理自戒。天下猶疑之。疑之則謗生。謗生則禍起。曷若祿之於外。以養其身乎。惟陛下圖之。其在當時。而能奉法守公者。此固宜褒崇而激勸之也。議刑罰。臣竊見前此為帥者。皆為嚴刑重罰。可以整治軍旅。不察其情。不原其心。故罰不當罪。多怨怒而深恨之者。方平居無事時。雖上下相制。不敢犯分。然而人心已離矣。一旦有警。誰與效命。不測之變。殆將由是而生焉。庸將鮮知此理。嗚呼。人心不可輕失。豈特為將者然哉。為人上者。儻不思所以正心修身。事每謹微。一失其心。不可追悔也。議大勢。當今大患。不在逆豫。而在醜虜。此天下之所共知也。虜既衰敗。豫何能為。故今日之獻說者。莫不以得地莫能守。遇虜莫能敵。為朝廷之所甚憂。然而金人譬之虎也。擒虎者。必使其力困氣弱。心亂技窮。而後虎可得焉。夫使金人安然蠶食數十州之地。未嘗有東顧

西備之憂。而日坐待其弊。其說蓋已踈矣。况豫之乘暇。因間以整其人。而又生一敵乎。故夫量力度勢。止嚮而爭天下。不可一日而忘之。此天下之大勢也。臣故備論之。議將帥之情。臣嘗謂握重兵。被隆委者。其過失常聞於天下。而事不任責。言可惑眾者。未有不獲美名。此何故耶。人情惡人之在己上。而患己之不能有所成立。凡有血氣者。皆然也。是以紛紛之論。莫可究正。豈獨將帥哉。然則人主何從而辨之。要當學古之道。酌今之情。苟於吾心。未見有可用之實。勿輕以畀付也。知之而後用之。用之而勿疑。天下之事。可不勞而定矣。議假竊威權。堂上遠於百里。堂下遠於千里。門庭遠於萬里。人君端拱九重之內。而欲徧知天下之事。盡察天下之情。不亦甚難乎。臣嘗謂為君有要道。在夫善任人而已。不然。則一己之聰明。何以勝千萬人之思慮。是故自古聖賢之君。必選端正忠實之士。以充左右侍從之列。廣問博詢。而姦邪壅蔽之計不行。昔人之喻。謂虎有以狐自隨者。以狐終不能竊弄其威也。然狐隨虎而行。則百獸為之辟易。而其威信焉。曷若遠而去之。之為愈乎。在昔人君之於臣下。固有知其操術之不正。施為之犯義者。謂我之聰明。足以制而御之。曾不知其耳目所不及者。所損多矣。可不戒哉。議道理。甚矣明皇之於祿山。愛寵而親信

之也。雖妃子之貴為之執爵以飲之。豈非欲得其誠心而托其捍禦疆場耶。然其終也。不能免其不叛。至使六飛蒙塵。四海肇亂。其故何哉。御之不
以心也。嗚呼。人主以一身而臨億兆衆庶之上。所恃以承祖宗之業。建百
世之基者。惟理道所在耳。得之則治。失之則亂。儻惟此之行。如圭玉之純
略無瑕汚。如日月之明。曾無掩蔽。王道不難成也。夫今日之為將帥者。忠
義之質。出于所性。蓋天實生之以佐陛下中興。且久與書生從處。於古是
非得失之計。亦耳聞而心熟之。臣願陛下待之以正禮。遇之以直道。不復
少有間隙。俾之或得而窺伺。則君臣享福。垂美無窮。豈不為千載之盛事乎。
議讒間。自古陷害忠良者。莫不先譽其美。稱其善。使人主初不寘
疑。然後乘間伺隙。其說得以行焉。或託之星象。或假之圖讖。或借助於獻
言之人。浸淫日久。而人主之心移矣。昔陳平捐萬金而間楚之君臣。范增
卒以不用而死。讒間之為人害如此。臣願陛下每於斯事。謹聽而熟察之。
議進取。臣聞諸論者曰。今借使復中原。擒劉豫。得其地而不能守。金
人之來而不能破。一豫復起矣。是動不若靜之為安也。曾不知虜肆不道。
豫為叛逆。天下疾憤甚矣。王師一振。勢當百倍。虜復聚兵。又安能為我敵
乎。况其釁隙既開。怨讎交起。棄亡可翹足而待也。不然。為吾之計者。是終

無適而可矣。且將束手而待盡乎。論太原。昔虜人犯順之初。以五萬
之衆環太原而攻之。久而不下。乃築長圍而去。留數千銳卒於此。休兵息
馬於沙漠之地。天下始困弊矣。嗚呼。竭天下事力。不能解太原之難。而終
至於京城覆亡。宗廟播越。我之失計。亦何多邪。夫毒獸之害人。未至死亡
者。在手當斷其手。在足當斷其足。所損固大。而生尚存也。向使朝廷此重
兵于澤潞。大饗士卒。厚給廩餼。據險而守之。不急急於太原之救。虜未易
度太行也。故夫天下之患。莫大乎一有變故。而不能定議審處。自取顛覆。
且國家自創業之初。江淮兩蜀。率皆未下。秦晉之地。尚多賊。有祖宗以次
征討。志意未嘗少屈。胃中有所處故耳。今天下蒙祖宗積累休德。功無難
成者。獨恐夫說說之議。惑聽疑心。一有驚急之報。上下自紛亂耳。臣願陛
下以此為鑑焉。議朋友。臣嘗謂人之大倫。朋友居一。於朋友而薄之。
則父子君臣之間。從可知矣。後世乃有賣友欺友。而得寵於君上者。風俗
何為而純厚耶。議大軍屯駐。臣嘗觀楚漢交兵之際。漢駐兵於穀澗。
之間。則楚不敢越境而西。蓋大軍在前。雖在他岐捷徑。不能踰越也。故太
原未平。則粘罕之兵不復濟河。亦以此耳。今之論者。多以前後空闕。虜出
他道為憂。曾不議其糧食所自來。師徒所自歸。彼其上下之心。安得無恐

而不至離散也。不然環千里之地。盡以兵守之。然後人心可安。議兵至此。不亦踈謬乎。議出使。近者日親。遠者日踈。人之情也。况於君臣之間乎。古語謂一日不朝。其間容戈。其所由來遠矣。故息壤之盟。終不能定其君之志。自古立事者為難也。臣遭遇陛下。特達之知。每去行闕。動以歲月計。亦仰恃陛下神聖聰明。必能洞察而力主之耳。至於浸潤之言。裨闖之論。疑似之間。機數之起。願陛下加察焉。議均節。天生民而立之。君。俾司牧之。非特使之奉養其私而已也。自古聖賢之君。莫不恭儉節用。損己益人。凡以順天意。享天心耳。且農夫終歲勤動。計其十畝之耕。輸公上而有餘者。所得不過一釜耳。我乃捐之以市。不急之用。棄之以徇無名之費。豈不重違物理乎。乃若排去大難。勸賞有功。宗廟之供。官吏之俸。將士之養。此則宜從優厚。而不容但已者也。臣仰惟陛下。至誠恭儉。追古聖賢。而臣竊聞文書刀劍之求。尚容有賜予過制者焉。夫多難之時。人情易恣。力戰效命者。所得如此。而伺間投好者。顧亦如彼。即解體矣。衛懿公好鶴。鶴有乘軒者。將戰而國人皆曰使鶴。臣謂非獨名器為然也。錫賚之間。亦所當謹也。議練兵。士有好為大言者。以兵家勝負。在將不在兵。苟將得其人。駢市人而戰。可也。將非其人。兵精器利。曾何補於用乎。嗚呼。為此說

者。蓋亦不思之甚矣。夫趙歇哀初歛之兵。號稱二十萬。能戰者無幾也。韓信率新勝之人以破之。借使金人舉河北山東之眾。無驍騎利甲。無堅弓良矢。雖董之以粘罕。輔之以偽太子。臣知其易為敵矣。故有精練之卒。然後可以議嚴訓之方。有訓練之兵。然後可以議兵器之利。有堅利之器。然後可以議破敵之計。知此數者。庶乎可以論兵矣。彼空空然謂可驅市人而戰者。豈不誤國惑聽乎。議任事。昔漢高祖得陳平於亡虜。其信任不疑。至捐萬金而輕以予之。苟書生儒士。與聞其計。得不痛惜而力止之乎。臣謂非特漢祖為難能也。陳平受之而不辭。為尤難焉。使今之為臣者。蒙陛下以萬金付與。殆將自失而走矣。夫拯天下之難。救生民之急。非君臣同德一心。慨然有高天下之氣。事未易立也。平本無王佐之才。特其英姿雄畧。差出一時耳。尚能輔漢成四百年之業。况以陛下之明聖。仰承祖宗積世休德。苟為臣下者。不惜其身。不顧其私。不慮其禍。任天下之責。而為之。庶乎或有濟矣。如臣愚陋。終恐不足以副使令之萬一。議親民之官。設官分職。本以為民。故聖人視勤勞之大小。命品秩之高下。非有功於民。不在選也。監司守令。於民最親者也。今皆號為冗官。及瓜而去。則乞憐於人。莫有顧者。彼文辭巧麗。親舊推薦。期歲之間。可致清要。茲豈不倒

置已甚乎。嗚呼。求天下之士於言語文采之間。臣知其無以得真賢矣。況夫推薦者之不公耶。後世坐廟堂秉樞要而於安危之機。治亂之理。百姓之情。財用之源。甲兵之事。瞢然不曉者。無他。用之無其道也。繼自今以往。可不知所戒哉。議堅忍立事。臣嘗觀漢祖因思歸之兵。與項籍力戰。滎陽成臯間。大小七十餘戰。身因兵潰者數矣。然則良平之計謀。曾不預其敗乎。是不然也。夫高祖東嚮以爭天下。良實啓之。平多奇畫。高祖數賴之。以免。至於不幸而用兵未利。則亦上下同心。姑為善後之圖耳。何至紛紛然自為離間乎。此其所以能終有天下也。燕退樂毅。秦用孟明。可以為鑑。而况不為樂毅孟明者耶。議忠臣良臣。臣竊聞真宗皇帝嘗著忠臣良臣及權臣姦臣論。臣以為忠類權。良類姦。何以言之。忠則任事。任事則多怨。豈不幾於擅權乎。良則委曲。委曲則不暴。豈不幾於為姦乎。然則人主於此。如之何而辨之哉。則亦視其志之所存而已矣。彼其志在天下國家。切切然以身任內外之責。是之謂忠。志在納君於善。將順其美。是之謂良。乃若營私立黨。蔽欺君上。苟利於身。以死力行。則為權矣。逢君之惡。事每阿循。反覆變詐。陰肆讒間。則為姦矣。臣故別白而具論之。議皇極之道。甚矣古之人君。喜人為善。而樂人之改過也。臣於洪範見之。其言

曰。凡厥庶民。有猷有為。汝則念之。不協于極。不罹于咎。皇則受之。而康而色。曰。予攸好德。汝則錫之福。時人斯其惟皇之極。夫不協于極而受之。自言好德而信之。聖人所以待下者。豈不忠且恕乎。或謂好德者。許之自言。容有欺詐。聖人信而弗疑。得無害於治乎。是不然。聖人修身以化人。推誠以待人。積之歲月。雖欺詐者。且將遷而為善。况於不忍為此。以負其教誨者耶。蘇軾之論。以謂唐武后之無道也。非獨進人。無所留難。士之自薦。皆得盡其才。其後開元之間。幾致刑措。皆武后所收也。德宗好察而多忌。士無賢愚。例不得進。國空無人。以致奉天之禍。故陸贄有言。武后以易得人。陛下以精失士。至哉斯言也。臣故併陳之。議進退人材。人主之於人材。試之州縣。養之館閣。見其可用。則用之。不必以未盡深知為嫌。見其可去。則去之。見其可罪。則罪之。不必恥其用之於前。而遽廢之於後也。要當如天地之於萬物。一切待以無心。吾之為此。凡以為民而已。非有一毫私意於其間也。雖然。人才之遇合。又有大患焉。或因一言之契意。雖無長才。奇畧。寢以柄用。或因一事之拂意。雖有賢德。美行。寢以踈遠。此無他。蓋其喜怒好惡之氣。未能平之以歸于道。故投隙乘間者。得以行其姦也。夫如是。則日復一日。賢者益退。不肖者益進。終至於國家喪亡。天下大亂。初以

為得計。而其失計莫大於此矣。初以為我之威福得以肆行。而其後威福不行。莫大於此矣。故古之賢君。莫不正身平氣以求合於聖人之道。其用意終在天下百姓。不敢私其一己。是以於進退人材之際。無不當理焉。臣願陛下力行之。議聽言之難。古語有之。築舍道旁。三年不成。蓋言之者多。則聽之者惑。自然之理也。帝王之道。聽雖欲廣。斷惟務獨。故成湯之伐桀。百姓以為我后不恤我眾。舍我穡事而割正夏。主其議者伊尹而已。武王之伐紂。雖夷齊之賢。亦叩馬而諫。風雷暴作。皆有疑心。主其議者太公而已。今日之事。以中國而攘夷狄。以君而討臣。以有道而誅無道。雖遲速大小。所舉不同。終在夫力為之而已矣。往歲江湖皆旱。獨二浙豐稔。故可以給軍。須請百姓。向使浙亦被災。則大事已去。惜乎議者之不思及此也。機不可失。賊不可縱。時不再來。昔人論之詳矣。臣去國踰旬。憂慮倍積。惟恃陛下主之於內。故不憚詭譎之言。冒瀆天聽。所冀曲賜照臨。議祿廩之制。先王制祿。以代其耕。用意深矣。蓋倉廩實而知禮節。衣食足而知榮辱。非特百姓為然。今使委質而事人者。仰無以事父母。俯無以育妻子。且不有多寡之數。厚薄之差。以激勸勤勞。獎厲才智。何以風動在位。使之自立于無過之地耶。夫合天下之眾。而君之欲舉得其歡心。亦在夫本

人情而為之制耳。過制則紀綱亂。不及則人心離。是二者其失均也。嗚呼。仕宦不為利祿計者鮮矣。儻夷齊之操。人人為之。則天下之士。盡為山林之遊。人主安得而器使之乎。至於左右近習。又宜深察而熟究者。彼其生長富貴。奉養有素。日用不給。何以責廉。將自營其私耶。則有浸漁細民之嫌。而恣謗日益以生。將受遺於人耶。則有請求納賄之罪。而國體日益以損。臣謂不若省其負。優其俸。然後責之以善。則其從之也輕。茲有天下國家之大計。人主不可忽也。議行師。臣嘗讀易至謙之上六曰。鳴謙。利用行師。征邑國。至復之上六曰。迷復。凶。有災眚。用行師。終有大敗。以其國君凶。至于十年不克征。夫鳴謙而虛已。則善日益以進。過日益以聞。四海歸仁。上天眷祐。故用師為得之。若乃迷復而不反。則遂非恣欲。寢失天下之心矣。故終有大敗。臣讀易至此。始知兵家大要。特在夫人君之一身。今陛下修己進德。孜孜不倦。上可以通於天。下可以格於人。臣知夫大功可立。中興可期矣。更願陛下勉之。謹之。悔咎自省。無使驕怠之意。少生於中。帝王之治。豈難成哉。張魏公奏議論車駕進止利害。臣昨日幸侍天光。獲聞聖訓。退而思之。惟是車駕進止一事。利害至大。臣區區中懷所見。未知當否。敢以剖露。惟陛下深思而詳擇焉。臣竊惟天下之事。不唱則不起。

不為則不成。自古賢聖之君。平定禍亂。未有謙退遠處。而能躋天下於太平之域者。惟太公避狄。句踐報吳二事。士大夫多以為口實。不知與今事勢。萬萬不同。夫祖宗二百年積累之基業。付在陛下。不幸而虜人陵之。叛臣據之。陛下不得已而養銳待時。以俟天定。猶之可也。至於事有可為之理。時有可興之勢。思前慮後。猶豫不決。豈不重失人心乎。臣請以恭諭善奕者。先固基本。次定筭數。臨以大勢。使之左右枝梧之不暇。然後我勝可必。彼敗可分。今四海生民之心。孰不思戀王室者。虜叛相結。脅之以威。雖有智勇。無由展竭。三歲之間。賴陛下一再進撫。士氣從之。而稍振。民心因之而稍回。正當示之形勢。庶幾乎激忠起懦。而三四大帥者。亦不敢懷偷安苟且之心。夫天下者陛下之天下也。陛下不自致力。孰肯履危險。忘寢食。孜孜焉。惟恢復是望。而愚忠不移者乎。臣意謂今日之事。存亡安危。所自以分。陛下六御儻還。則有職解體。內外離心。日復一日。終以削弱。異時復欲下巡幸詔書。誰為深信而不疑者。何則。彼知朝廷姑以此為避地之計。實無意於圖回天下故也。陛下若斷自宸衷。有進無退。車塵一動。上可以格天心。下可以順民望。虜叛之勢。寢以蹙縮。大功自是而立。大業自是而成。論者不過曰。萬一秋冬有警。車駕難於遠避。夫軍旅同心。將士用命。

扼淮而戰。破敵有餘。况陛下身臨大江。氣當百倍。苟士不效力。人有離心。陛下雖過自為計。將容足於何地乎。又不過曰。當秋而進。士有戰心。及春而還。絕彼窺伺。此特可舒一時之急。應倉卒之警。年年為之。人皆習熟。謂我不競。當有怨望。難乎其立國矣。又不過曰。賊占上流。順舟而下。變故立生。所不可測。夫襄漢我有也。賊舟何自而來乎。虜叛事力有餘。果能陵犯水陸偕行。自上而濟。陛下身處臨安。去建康無數舍之遠也。處之其安否乎。三者利害。有同白黑。矧惟陛下。遭兩宮之大恥。負四海之重責。天意人心。兩皆屬望。有為而去。天下猶矜憐而歸心陛下也。不為而坐待其盡。為禍可勝言耶。夫為將帥之策者。恐臣導陛下而前督其進取。曾不知事有機會。時有利鈍。士馬不能遽益也。賊勢不能立破也。要宜剛大其志氣。恢洪其度量。以拯救天下百姓為心。仰無愧於天。俯無忤於人。度事而為。審時而動。先謀自治。利而誘之。致而破之。何難而不可濟哉。惟陛下斷以恢復為事。則任恢復之人。以退守為事。則任退守之人。使各引其類。求其黨。一意施為。為陛下畢盡死力。庶乎不至於操持兩端。擇利自謀也。臣又竊譬之。父有痼病。其子欲以瞑眩之藥治之。而或者爭止焉。為或人之謀。疑其愛已。為子之謀。似乎不審。然而人各有心。姑取諛悅。捨此適彼。所不慙。

馬謂子為不盡忠乎其父豈不過謬哉。今臣侍陛下以還。為臣之謀無所任責。誠亦得計矣。為陛下國家之計。恐有所未至。是以披心腹。露肝膽。反復一二言之。而不知其當否。惟陛下裁赦。貼黃。臣輒盡已見。仰塵聖覽。區區臆說。未知當否。願陛下因此閑暇。更加聖思。齋戒沐浴。以告于宗廟。謀之鬼神。此大事也。臣豈敢固執一己之見。異日惟陛下詳教。而曲諭焉。庶幾君臣之間。得盡心腹。不貽萬世之論。論車駕進止事宜。臣昨日得呂祉私書。以建康宮室未備。意望車駕少留鎮江。庶幾事集。臣反復計之。容有可議。今天氣尚熱。恢圖是時。大駕儻有定居。人情自當振作。有司措置錢糧。亦須以時而辦。臣意只欲於鎮江暫駐三兩日間。乘此晴明。便行進發。更乞聖裁。三月上奏。乞降車駕至江上指揮狀。臣契勘日近事宜。警言急。正當鼓作士氣。以圖戰守。臣愚欲望聖慈。特降車駕至江上指揮。未須進發。庶幾將士聞風。各圖效命。伏乞詳酌施行。取進止。范太史集。乞車駕不出劄子。臣等今日入侍經筵。伏見皇帝陛下。氣體清羸。猶未復舊。適聞來日車駕欲出臨奠孫固。緣固家見居石頭巷。往來甚遠。又方盛夏。竊恐聖躬。初就康復。正當保護。未宜衝冒。昔唐太宗欲出臨高士廉之喪。長孫無忌。伏馬前流涕切諫。太宗乃還。并檢天聖故事。宰臣張知自參。

知政事。魯宗道薨歿。兩宮亦不並出臨奠。伏望聖慈。更與執政大臣詳酌。特罷臨幸。取進止。四月十三日侍講。臣司馬康。臣范祖禹侍讀。臣趙彥若劄子。貼黃。臣等三人。今在寶錄院。更不及與范百祿。吳安詩同共聞奏。乞車駕所過不毀民屋劄子。四月十二日。臣伏見祖宗時。執政大臣第宅。散居諸處。或遇亡歿。車駕臨奠。儀衛簡省。雖入隘巷。亦不拆毀民屋。自熙寧初。置東西八位大臣所居。近在闕門。雖有臨奠。更不經歷街巷。昨來曹佺之喪。二聖臨幸。有司毀拆屋舍。大過。居民不無失所。雖百姓多侵街差屋。毀之不敢有怨。然因車駕經過。比之他處。獨被煩擾。恐非陛下仁聖子育萬民之意也。今孫固亡歿。已在外第。街道甚遠。竊慮車駕臨奠。有司毀拆更多。臣愚欲乞先降指揮。除大段窄隘處。量加撤去外。無令過當。拆屋。庶使聖駕所過。小民知恩。取進止。張守毘陵集。車駕經由常州。乞上殿劄子。臣恭聞警蹕時。經由常州。臣乍違天陛。竊願一瞻穆穆之光。少慰犬馬戀軒之誠。伏望睿慈。許臣候御舟。上殿一次。取進止。

永樂大典卷之一萬二千九百二十九

永樂大典卷之二萬二千九百三十

永樂大典卷之二萬二千九百三十

一送

宋

高宗一百七十二

宋員興宗西陲筆略虜初命將窺蜀。虜初發難叛盟賊亮謂眾曰誰能為我攻蜀者我貴之。或曰惟某將可。即引某將封拜。令專兵西鄉。某將曰蜀城險人和。引日以取。弗可取也。亮以為沮眾。殺之。并誅其家二百餘口。翌日再命合喜字董。合喜恐懼受命。遣民驚徙狀。虜將初議窺邊。遣民懲艾建炎初禍難之殷。復議驚徙。成鳳間有女婦嬰幼危墜淵谷者。有掠郡縣財物主名不立者。階州城下。武興節制司。申有強盜浸浸自北谷不介而出。去武興數里。今不剪。恐為後憂。上司命以一旅勦之。無何城中遂定。秦州賊將驕傲致敗。秦州初未下。招討司命劉統領海取之。或曰大夫促行。賊素傲以驕。今驟以兵取之。以湯沃雪耳。先是偽守及將領皆流酒荒宴。不輟素狎。官軍弗之虞也。將兵將軍乞求閹者尤甚。每酒酣自歌曰。金亦有。銀亦有。我曹為樂宜耐久。未幾城壞其旗幟有飾而未綴綴者。後盡俘至軍前去。官軍因糧於虜。官軍既下秦隴。凡山西阨塞

積粟。奢聚甚衆。謀者云：虜意不在小。本舉是餉軍。且求窺蜀也。及屢敗秦州及臈家城。得糧約十八萬石。浮休約五千石。小石寨約二萬石。威姬寨約二萬石。水落約一萬石。其他千百石。往往而在前後。共三十五萬石。故官軍所至沛然。殆非人力也。西安輕卒被害。過秦數百里。西安寨者亦險阨之衝也。虜令賊將幸杲者守焉。幸亦驍武。本蕃族。數為邊患。東路都統司姚仲命其將將麾下攻之。因謂曰：賊屢敗。兵輕且囂。易與耳。汝攻之。慎勿逗遛。其將乃去寨十里所駐兵。分百餘卒傍虜營立柵。其夜虜劫之。餘兵殲焉。議者謂將分輕兵于外。既非餌兵。又置之必死之地。所謂無故棄人於虎口者也。或曰：某將素亦有聲。豈亦名過實者歟。某將姓傳虜出。令遣間諜。虜既與官軍相持時。遣盜走軍為謀。然竟弗達也。予訪邊將云：虜近令。如有以南事告者。人賞銀一則。二十五兩為則。獲正軍一級。博軍一級。賞以錢。人叁拾阡。雖以此激衆。未有為之用者也。秦州徙城北山。距秦州數十里外。皆平川。所謂秦原是也。承平時。四城周遭。望之魏魏。一都會。邑屋甚壯。既陷虜之久。餘民居止千一。虜遂徙城北山。若一堡。然北山即隗囂故宮。杜少陵所謂秦州山北寺。故跡隗囂宮。乃其地也。然山最徑險。虜既城其上。若控以兵。則秦隴亦未易窺也。劉海適掩不備。

得之。所謂先人奪人。迅雷不及掩耳者歟。鄭宗柝下臨洮。然勇而無謀。鄭宗者亦西人。為副將。與馬仲希聯戍岷宕間。上司令携旗榜招臨洮守將。偽守趙鈴轄者。稍知義理。悉蕃漢情。宗初至城下。張旗榜大呼曰：虜政亂。天意回矣。鈴轄何不下與諸將共取富貴。今臨洮兵少糧少。鈴轄執迷不返。悔無及也。趙即率吏民夜開門。拜道左。及官軍下鞏。宗亦在中。諸吏方受降。列飲城外。宗請先入籍兵仗。封府庫。以待諸將。會虜援騎大至。宗聞之。跨鞍不甲而馳。舞稍自衛。虜喧咽。宗急爭門不聽出。或飛矢貫脇。宗即死。至今洮岷諸公共惜之。以為勇而無謀者也。賊將楊鎮國兇狡。賊將楊鎮國者廢其名。亦為洮大將。洮兵素弱。楊常飼良馬數十甲。而伏諸壁。及官軍入洮。諸將問鎮國安在。曰：夜已出去矣。至今往來熙蘭求為邊患。而竟不能也。熙蘭蕃族。為虜用。官軍未得洮河。如熙蘭等處。蕃族部落村奔等。多為之用。或為虜人鄉導。或為虜人輦重。官軍所介。往往群聚嘻笑。戎狄畏服大種。蓋其天性也。及河隴既下。部落村奔大震。夷語謂酋豪為敦。又為村奔。敦者村奔之反音。村奔者其義為一村所奔走耳。劉海治平之役。戰最力。十二月二十五日。治平之役。統領官劉海踏白小溪嶺。携矛直前。先士卒。有千戶溫狄哥者。狄哥一名潑察。字董。賊

驍將也。自林外橫出擊海，槍注雙螯甲葉，墮者三馬。左右騎皆驚，顧辟易。海伏馬鬣，以槍貫賊洞，貫墜馬。海救左右曰：「速取其首以來。」賊瞪視，猶手箭者三，墻立不動。漢騎欲前取之，賊注射兩騎，皆斃。因折弓于膝，瞑目受誅。次日，漢軍因堵進，虜以故敗去，斬級可計者凡二百有奇，傷死者無筭。馬海字朝宗，山東人。兗州紹興初，為馬軍副將，名字埋微，金冠折合字董。犯山西諸營，欲遣探騎，主將吳公曰：「若劉海者，沉壯可遣也。」即以海將騎三百前道，覘索至石壁寨。在鳳翔管下三十五里，忽與虜遇，虜軍三千餘，伐鼓大譟，飛塵漲天。海率騎士殊死戰，殺虜幾殲，一騎西馳告捷。主將曰：「五鄉所遣騎乃探騎耳，豈人人關張乎？」海以遊騎三百而屠賊三千，何從得此，頃之，俘馘輜重，至者盈庭。即日命海為達州刺史，秦鳳路都監云。博軍子利害。初，上司許西民勇鷲者，能出力詣軍，縣官為給復賞，皆如律。因命曰：「義軍亦曰博軍，眾推曰小火子，既得旗榜，或能牽制敵人，聞撓虜勢，亦博軍力也。然西民陷虜之久，必欲鄉義，河右郡縣往往財物橫見，掠奪千里，蕭條遂無舍煙，此皆博軍之為也。」上司見為要束耳。諸將議取河州，先破熙，援兵。正月晦，官軍議取河州，統領官惠逢、蕃兵總領李進、鈐轄榮某、張某、兼知寨皆會，或曰：「我擒河州而賊兵單弱，以強制弱，何

憂不克。一將曰：「不可。」吾聞虜軍盡在熙，官軍若直擣河，勢必來援，吾表裏受制，此危道也。不若引兵而西，潛據險路，虜將忿兵伺其不意，可一戰以擒也。熙兵若破，則河自下，眾曰：「善。」即伏兵長浴口。一名問家峽。正月十九日，已而虜遣燕大將小郎君者，提正軍千五百，從軍亦如之，徑至浴口。惠逢令羸卒數十騎誘之，約曰：「旗動乃發。」虜兵薄羸騎，傍徨旗動，伏兵大奮，會天風起，人馬不辨，李進為兵在旁山上，若聞空中聲云：「蕃兵亂，蕃兵亂。」進令左右下山，用平弩旁射，虜大亂。鈐轄榮某手殺賊數十，賊望風奔靡，遂大敗，死者無筭，擒活兵三百五十，解招討司。二月二十一日，處置訖。治平之役，先發探騎，遂破虜。初，官軍欲攻治平，諸將曰：「吾眾徐行，則不為功，疾行，則不知虜之眾寡，不若使數百騎行前，伺虜之怠，乃可擊也。」即命將官李庠將驍騎三百，名曰探馬，日中騎前數十里，虜兵忽合，呼聲隱地，庠愕惶，令一騎逸至軍所言狀，諸將失色，或曰：「今若出軍救之，亦無及矣。不若勿救。」統領官劉海奮曰：「不可。」探騎雖少，皆吾人也，不救，則吾已戰者盡殲，未戰者益沮，救不可後也。即以數百騎突前，諸將隨之，既與虜遇，遂破之。官軍疑虜援兵，遂去治平。官軍既攻治平，敗虜眾，虜謀欲遁，或有說之曰：「南軍知吾眾遁，即追擊我，使我立盡，奈何。」不若火城寨為疑。

軍如此走未晚也。因大火城柵散朗如畫。官軍以為援軍大至。亦引去數十百里。虜因遂遁。識者至今共惜此舉也。官軍巧於取秦。予訪邊人長老皆云。官軍最拙於戰。治平。巧於取秦。此言有理者。九月十九日。武階騎兵統領劉左。武海被檄。即引兵星夜以出。二十三日。傳秦州城。虜不虞南軍之至也。至近城數里。乃覺之。有數十騎躍出海。曰。是來欲爭利。誇所長。必知戰者。即列卒屠之。明日。海與副將賈士元。王中正。計曰。秦城險而堅。未易攻也。今城守似怠。當攻以火。煙甚則蔽物。賊雖有耳目。何施耶。是天以賊賜我也。遂積藁縱火。煙上蔽城。水寨破。秦州外小城海登焉。夜中。偽守蕭濟開門以降。先是虜軍戍秦者。正卒三千。前二日。就傍郡打糧。弱者守室。壯者未返。遂至於敗云。李進勇悍。與士卒同甘苦。間亦微巧。蕃軍統領李進。在洮河間。或間出遇虜數十騎。顧曰。汝還識是人否。是所謂茶李三者也。令驍騎四人突前直刺進。進刃三人。挾一人以返。進所至。與士卒下列同甘苦。故人樂為用。然出軍多避就。不肯為軍鋒之冠。將士多譏之。進為人。長行日二百里不殆。邊人號為鐵脚鷄云。馬仲希庸謬。遂失熙鞏。馬仲希者。宕昌屯駐將也。為人妄庸。丁巳冬。都統司命仲希進兵取熙州。仲希得檄。即氣索。不得已。進營熙州城外十數里。或為虜將

謀曰。吾知仲希妄人耳。且暗兵事。此易撓也。即遣間宣言曰。北軍今夕當大至。眾共劫營。南兵之來眾寡。何似。北軍其能敵乎。仲希聞之。昏時拔營遁去。初熙州父老聞官軍至。有欲率眾歸附者。心大喜。及翌日。仲希去。皆大笑。仲希既去。熙傍遑無所。適聞諸將將下鞏。乃引兵來會。時鄭宗李進。榮某等。已誘虜將龍虎。在龍虎上將軍。名滿察烏也。方議拜降城下。龍虎者。故虜大將黑煞子也。一名黑風。以父死事。虜主貴而壻之。今以兵守鞏。龍虎自度力屈不支。使人來言曰。我降諸將。諸將好受我降。當以酒餼相饋。何甲也。願盡釋鎧仗。我出與公列飲城外。仲希諸人許諾。李進不肯曰。虜誠偽未可知。且吾遣人候城中。城中夾道積錢。安知不吾詐也。吾不願飲。龍虎出。諸將長揖環坐。進窺衷甲以待。少選。虜援騎四至。龍虎欲起據鞍。蘭州歸明將王宏曰。事急矣。何不遂取此虜。鈐轄榮某從後斫之不殊。宏繼刺之。騎士張玘斷其首。坐者皆鳥獸散。獨鄭宗死城下。久之。宣司以仲希再失二郡機會。梟首以令諸軍。傳軍為僧徒所誘致沒。武都安化有土豪李六者。以氣雄一方。統制李選姪。請旗榜使司。卒鄉民強有力者。四百餘人俱。時時剽掠為事。一日眾至德順野。次有僧舍曹居。李即稱兵以入。一僧曰。大夫何遽至耳。胡不入室。束爾戈矛。取爾財帛。吾僧徒拱

手託命而已。一錢不占也。雖然大風苦寒。請出為大夫具醪飲。如何。李曰。如此大善。僧出。眾因弛甲環坐。間有熟寢者。虜兵忽薄寺。眾遂殲焉。乃鄉者僧徒招之也。曹建有季父風。官軍將攻治平。有曹建者。故知鳳州武姪也。武凡戰。即持刀斫陣。戰皆疾力。甚為西人所紀。建長有武風。以故軍中亦以曹大刀名之。武階副將。鄭庠既為虜騎所薄。諸將皆前援之。劉海謂建曰。子生平持大刀。盛壯自喜。今日乃效弱夫。怙懾陣後。何鄙也。建曰。大夫責建。良是今日。建得死所矣。即大呼而出。有虜驍騎突來。建揮刃。人馬折而為二。虜陣遂靡。建因奮前。誅殺過當。先是武舊戰冉家彎。令諸子羣從執異械以從。其名有狼牙棒。馬刺刀。峯鐵鞭。所過如山之摧。以故屢成功云。河州士民望風歸義。官軍既薄河州。偽守及同知望風降下。先是虜寧河寨官者。幽異人。堅為虜守。無下意。百姓聞之。排戶裂其尸。擄首詣官軍。初。諸將議河州富厚。久陷逆地。人心去留未定。及薄城下。民爭開門。香車花輿踵道。皆曰。我曹華人也。衣冠禮樂之舊。前日被髮左衽。實非我願。今親父臨我。我敢不認耶。有再拜流涕者。大槩山西編戶。願為王民類如此。虜潰將招西蕃部落為軍。熙州虜正軍。不過二千餘人。閻家峽之戰。為官軍破。滅者殆半。虜將小郎君。退收潰卒。併招西蕃部落。

予為正兵。有賊將李節使揚鎮國。趙鈐轄者。皆故敗虜。聚兵與之合。大略不過萬人。邊將常曰。虜兵易與。十不敵部落一二。山西既下。則部落行且離貳。可以見虜無能為也。平河之功。士以賞薄致怨。河州既下。諸將方籍庫藏。編什物。人人眩功。不相能者甚眾。或言當暫賞軍。主將令人支錢十餘。時食物貴。踴炊餅。一直錢數十。諸兵得賜。擲地大詬曰。我曹捐軀下河州。今性命之賤。乃不直一炊餅也。及退也。殺馬關。兵間有道亡者。悲夫。兵法所謂軍無賞。士不往。軍無財。士不來。為將者。柰何其不思也。河民留諸將同守城。扞虜諸將共議出屯。河州在山西。承平時。最富貴。有原曰。萬頃餘糧。棲畝。民蔽野。距河數十里。曰寧河。又有金坑。近亦廢不治。諸將既下河。方議隱括庫財。或傳熙州虜軍大至。眾欲控城固守。主將惠逢曰。不可。虜眾我寡。河又初附。未易守也。有如城中翻覆。外救不至。則將奈何。即擄眾欲出。州民父老咸障馬曰。鈐轄何為去我。鈐轄但坐府中。我曹出力血戰。必有當也。何患兵少。惠諭眾曰。我今去此。求援兵于外。非直去汝。將返以援汝也。汝曹一心努力守城耳。即留都監王姓者。及博軍願留者數十百人。因出屯殺馬關。一名通會。是日李進亦乘馬過市。呼曰。河州父老有識。李進者乎。我乃進也。初不挾一縷以入。今不挾一文以出。因

鞭馬亦去。居數日，虜圍河。河民相率登城固守云。河民懲寧河歸順之禍，相與死守。虜再取寧河，寨石快意，戮寨民歸義者流血丹路。已而兵再傳河州諸將已去，城中百姓計曰：前日寧河之民南歸者，虜盡屠膾，我脫效之，即一寧河也。豈有全理？不如告諭城中父兄，相與守死，猶有千一得活。即籍定戶口，男子升城，女子供饋。郡有木浮圖，高數十百尺，衆因撤木為礮械。虜悉力來攻，木縋少，選壓賊有糜潰者，居三日，賊退屯白塔寺，距城五七里云。榮鈴轄先登，并諸將追虜曲折。虜自熙引軍欲援河，官軍既遇於閭家峽，軍交，有榮鈴轄者乘駿馬，揮鐵鞭掠陣，所向風靡，衆隨之。賊遂潰，虜主至今畏之。相戒曰：無輕犯榮鐵鞭也。榮等既逐賊，有數十百騎遁去，追騎襲至，托子橋，橋以截木為之。久故將敗，有一賊將自殿後立橋右，瞪目直視追者，曰：會來此，決死。追騎乃不敢逼，賊將自護渡餘衆，衆渡已，乃乘馬徐行去。後人有獲虜問曰：孰為汝將？小郎君者，曰：鄉也。身青服而馬朱甲者是也。微伺之，即前立橋右，自殿右而護渡者也。河州民伍為虜屠戮。惠逢既令兵官王姓者留河州，率義士民伍乘城距守。閏二月辛未，初六，虜劫熙蘭之兵，薄城下，彌望蔽野，兵械甚設。會義軍有射中虜將，曰：官人者，虜少却。癸酉，賊將小郎君等揚聲曰：河州能為南

人，允守甚壯。今我留此，萬一漢軍乘虛入熙，則熙又為人所有也。不如引兵歸援熙耳。乃率兵徑去，城上士卒伺知之，交口相賀。城守益怠，弛甲以坐。是夜，人人困卧，城隙漏上，賊驅鐵騎擣城，斯須壞州。民尚有不知賊至者。翌日，賊驅父老嬰孺數萬屠之，遷壯者數千隸軍。先是上司命惠逢、李進等會蕃漢兵援河州，逢以兵徒單寡，不能支虜，乞師者已再，頃之都統司差將領郭師偉將騎七百為逢聲援。師偉未至，河州再潰，逢屯通會，進屯臨洮。逢遣人謂曰：虜今再至，是無河州決也。吾曹罪在不測，不如併力以往，猶獲免也。進曰：賊兵愈前，近萬人，我以危兵綴之，必取辱。逢信之，因休士卒進，即星夜趨河州。後二日，逢聞之，掩面泣下，曰：李進誤我，進至河州，聞州亦已潰，虜焚蕩餘城趾而已。悲夫！河民鄉義而終不獲全，諸人相忌媚之過也。聞昔陸贄之論邊事曰：若一旦羣帥異心，則祇足生事，舊寇雖平，新患亦起，不可不察也。四邊用兵，祥徵甚多，關外四州，比歲屢荒，歲在辛巳，夏秋大熟，九月，軍興糧糶及約而辦，武都、隴、邽、成、鞏、棗、子造至四萬石，他物輸軍稱是。嘉陵江水平日，春秋之極，其流淺，既可涉也。冬十月，乃運舟，艫軸相銜以上。若大濠方漲，馬悲夫！賊金之禍，吾國烈矣。神久憤嫉於此，豈惟人心有知耶？許同諸公方議奏此事，得之矣。

虜人詐為旗榜誘博軍。陝西博軍既迭出迭入。時利剽劫。故邊民有棄田里耕鑿為之者相接也。洮岷間常有博軍數旅徑出。或遇賊騎卒千百從間道出。眾注視以為虜大集。議擊之。一賊突前軟語曰。汝曹無乃博軍耶。曰然。曰。汝無擊我。我曹亦博軍也。汝脫不信。盍來視。汝使司旗榜乎。眾乃就視旗榜。曰。真是也。因益玩狎。須臾塵揚。虜騎張翼擊博軍。得脫者十一二。又武都白崖楊氏子亦領眾七百為虜所詐。無遺餘焉。鞏民思歸義。二月招討司一日攻鞏。有父老數十輩。種具米麵。鞏以餉軍。至軍門曰。我曹聞大軍來。幸甚過望。小民自度無所用力。願犒從者。大將納其饋積餉物。軍門如丘。後數日城危拔矣。官軍忽引去。父老狼狽相謂曰。虜今覺我餉南軍。我無類矣。不如作計求活也。即殺官軍。後兵輦重者數級。并焚饋物而去。鞏州城中虛實。大軍再攻鞏。砲礮幾百餘座。衝梯如之。城中亦回砲不息。砲怒或引一人以下。諸將問之。進云。城中危甚。勢且不敵。太尉旦暮決力當得之矣。又問有蕃兵幾何。簽軍幾何。曰。城中甲軍不過千五百。食糧軍亦不過千五百。輦重者亦不過千百餘。皆編戶也。頃之。又有繼來降者一人。問之其辭皆合。四州山寨天設之險。虜以冬十月寒盟。邊民擾擾。宣司出令。使沿邊州郡細民據險相保。就其險阨之

所有若天設。如武州西有花石峽。右有楊家崖。成有董家山。洛有仇池。城鳳有馬嶺堡。秋防興趙二原而仇池尤高峙聳拔。其形如削瓜。上有良田百畝。可駐萬馬。飛泉凡九十有一源。大旱可濟也。山徑仰空如擲線。雖悍夫千百攻之。巧無所施。此山鬱鬱意有異人託之。東老謂萬古仇池穴。潛通小有天。豈殆然耶。張忠彥兄弟投偽事。賊將副都統張忠彥。本陝西兵官。故常事曲端。端者邊人所謂威武將軍者也。忠彥兄忠孚。尤克狡禍賊。紹興初。是年建炎四年。任陝西路統制。見同列進用。素缺望。會金寇婁宿犯邊。將至熙。忠孚即挾叛志。忠彥與相諧附。即進曰。我欲驅州吏北投。州吏肯從我乎。忠孚曰。兵權在我。欲驅州吏。驅大彘耳。獨餘李三行。未知人意也。原本缺三字汝可呼之入。李三者。乃統領官李彥奇也。為人尤惡戾。喜鬪。以故忠孚畏之。至是因呼果來。忠孚即閉閤。杖劍于膝。脅之曰。汝欲不齒吾劍。不若聽吾令。不然。今不得活。彥奇曰。統制所以命之。忠孚曰。人生共覓富貴。豈問南北乎。當與汝徑去。李亦唯唯從命。後數日。遂驅官吏陷逆地。同時有牟二者。亦熙河大將端部曲也。既陷虜。復歸西夏。當權用事。以謀叛為夏人誅死。牟常項金冠。邊將畏之。謂之金冠牟。二云。賊亮虐用西民。初。賊亮虐用西民。民不自聊。常曰。何日南兵來活我耶。凡

民歲輸錢曰門役錢時遣使下郡縣曰天使天使所至立馬戶外索銀曰立馬銀督事胥吏劇若星火曰了事人有司公事大吏即上下其手士民饋送曰搵盞錢又令陝西括馬數十萬分配河東北百姓戶養之怨殆入骨其政目類如此雖欲無亡不可也白常不肯仕虜紹興十五年偽書來徵在南將士王四小巢白常三人俱在遣中王曾任荆南總管巢亦位將領兩人至賊所即為効力獨常不肯仕曰丈夫死而死耳不能為反覆士每自樹頭衙曰前熙河安撫使白某虜撒海見之不悅也後欲強官之竟託疾以免常有治產在德順熙河女真守將惡之大詈曰孰有既臣我家而尚宋官乎枷禁數十日不為屈又欲蕩其產撒海憐而釋之今尚無恙云王宏歸順事宏歸順起於王去惡見別章蘭州王宏者本名家子父陷虜即悒悒思部署徒黨密欲從順會坐事虜帥鎖以地牢凡十餘年釋之軍興宏即劫蕃族以歸上司命為熙河路統領官摧殺之役宏奮曰吾赤手歸明驟官將領不以死報國非夫也即突出部署擊賊坐椅注飛矢如蝟宏不動虜援騎敗去宏叔父某亦建炎初名將也李世輔知同州欲劫賊皇弟即君南歸王亦起兵會之事覺誅死其人黑而長邊將謂之鐵幡竿西人諺曰誰為飛虎將無若鐵幡竿為王發也王明清揮

麈錄明清前年風底百僚夏日訪尤丈延之語明清云中興以來省中文字亦可引證但建炎已酉之冬高宗東狩四明登船涉嶮至次年庚戌三月回次越州數月之間翠華駐幸之所排日不可稽考奈何明清即應之曰自昔以來大臣各有日錄以書是日君臣奏對之語當時呂元直為左僕射范覺民為參知政事張全真為簽書樞密院皆從上浮于海早晚密衛于舟中者樞密都承旨辛道宗兄弟也各人必有家乘存焉今呂范二家皆居台州全真鄉里常州若行下數家取索日錄參照則瞭然不遺時刻矣延之云甚善便當理會繼而延之病矣不知曾及施行否去秋赴官吳陵舟過茂苑訪一親舊觀其所藏書目得已酉年李方叔正民代言詞掖從行航海所記頗備明清所緝後錄取王穎彥錢穆記錄其間於此亦有相犯者姑悉存之所恨尤先生不及見之耳其目云中書舍人李正民乘桴記曰建炎已酉秋七月車駕在金陵初一日下詔奉隆祐太后六宮外泊六曹百司皆之南昌命簽書樞密院事滕康資政殿學士劉丑同知從衛三省樞密院治常程有格法細務及從官郎吏皆分其半從行八月十六日隆祐登舟百司辭於內東門閏八月一日內出御筆以固守建康或趨鄂岳右駐吳越集百官議于都堂群臣皆以鄂岳道遠恐饋餉難繼

又慮車駕一動。即江北群盜必乘虛以窺吳越。則二浙非我有。乃決吳越之行。十三日制。以呂頤浩為左僕射。杜克為右僕射。繼又命杜克以江淮宣撫使留守建康府。松江諸將並聽節制。二十四日。從官以下先行。二十六日。車駕離建康府。九月八日。行在平江府。十一日。以翰林學士張守。簽書樞密院周望。為兩浙宣撫使。留平江府。初命周望為江南荆湖宣撫使。駐兵鄂州。以控上流。以頤浩不可離行在。乃改命焉。十月二日。從官以下先發。初五日。車駕離平江府。十三日。行在越州。入居府廨。百司分寓。十一月二十日。知杭州康允之遣人押到歸朝官某人云。自壽陽來。報金人數道並入。已自采石濟江。以未得杜克。周望奏報。朝廷大駭。集從官議欲移蹕江上。親督諸將為迎敵之計。宰相侍從同對於便坐。或謂且遣兵將。或謂宜募敢戰士以行。宰相呂頤浩又自請行。議未決。退詣都堂。午間得周望奏狀。錄到杜克書虜騎至和州信。已召王玘移師南渡。杜克親督師詣采石防守。朝廷稍安。從官乃請遣兵應授建康。又分兵守衢州信州隘路。慮胡騎自江黃間南渡。或徑趨衢信以迫行在也。二十一日。命傅崧卿為浙東防遏使。令召募土豪以備衢信。得江州報胡人破黃州。由鄂州渡江。向興國軍。洪州是日有中使自洪來云。隆祐一行。已於十一月初八日起。

發往處州矣。二十二日。從官又請對。慮胡騎不測。馳突請以郭仲荀輕兵三千從。車駕至平江府。倚周望。招韓世忠兵以為援。仲荀方自杭來。士卒老幼未至。易作去計。而令張俊兵以次進發。既對。上以張俊重兵不可留。遂決議皆行。退命直學士院汪藻草詔曉諭軍兵以迎敵之說。乃以二十三日。先發兵三千。車駕以二十五日起行。既至錢清堰宿頓。是夜得杜克奏。我師敗績。又康允之奏。人馬已自建康府徑路。犯杭州界。遂倉猝回鑿。二十六日。次越州城下。從官對於河次亭上。議趨四明。呂頤浩奏。欲令從官已下。各從便而去。上以為不可。曰。士大夫當知義理。豈可不扈從。若如此。則朕所至。乃同寇盜耳。於是郎官以下。或留越。或徑歸者多矣。二十七日。以御史中丞范宗尹參知政事。是日早。駕詣都堂。撫諭將士。移御舟過都泗堰。不克。二十八日。晚出門。雨作。自是路中連雨泥淖。吏卒老幼。暴露不勝其苦。命兩浙轉運陳谷瑞沿路排頓。用炭一千二百斤。猪肉六百斤。以給衛士云。十二月五日。車駕至四明。居于府廨。朝廷召集海舟甚急。監察御史林之平。自春中遣詣福建。召募海船。至是相繼而至。朝廷甚喜。十一日。親從班直百餘人。因宰執早朝。至行官門外。邀宰相問以欲乘海舟何往。頤浩喻以利害。乃退。上命辛永宗。勒中軍盡捕諸班直。囚之。十三日。

誅其首者十有餘人。並降隸諸軍。以待御史趙鼎為御史中丞。十四日。臺諫請對。上諭以不得已之意。又探報虜人已入杭州。劉俊引兵出戰。不勝。康允之走保赭山。詔六曹百司官吏並於明越溫台。從便扃住。於是左右司。御營使司。參議官。皆留十五日。大雨。群臣欲朝。至殿門。有旨放散。惟宰執入對。既退。車駕遂登舟。至定海。宰執從行。十六日。從官以次行。吏部侍郎蘇望之以疾辭。不至。詔給寬假。給事中汪藻乞陸行以從。十八日。聞有使人至。命范宗尹。趙鼎復回明州。以脩執既至。乃前所遣報信使臣而已。十九日。車駕至昌國縣。二十四日。遣權戶部員外郎李承造往台州刷錢帛。二十五日。早。得越州李鄴奏云。虜人已入宜興下寨。別令人馬自諸暨趨嵎縣。徑入明州。乃議移舟之溫台。是日。范宗尹。趙鼎回至行在。二十六日。啓行。自是連日南風。舟行雖穩。而日僅行數十里云。二十九日。歲除。庚戌正月一日。大風。碇海中。二日。北風稍勁。晚泊台州港口。三日。早。至漳安鎮。駐舟。知台州晁公為與李承造皆來。上幸祥符寺。從官迎拜於道左。是日。得餘姚把隘官陳彥報人馬至縣。迎擊乃退。又得韓世忠奏。見在青龍鎮。就糧。欲俟散人之歸。為擊計。初。命世忠駐兵鎮江。控扼。後聞胡人自采石濟師。上命追世忠赴行在。又欲令移軍常州。呂頤浩請御筆召之。上曰。

朕與世忠約堅守。今聞乃來。於是遣中使賫詔。世忠聞采石失守。已離鎮江府。登海舟矣。至得奏。上優詔荅之。四日。象山縣報人馬至明州。張俊為戰守備。明州西城外民屋盡焚之矣。然其意亦欲來赴行在也。晚得康允之奏。繳到杜克書。已在真州。與劉位聚兵為邀擊計。徐州趙立以師三千來。援建康。守陳邦光及戶部尚書李揆皆降于虜。六日。張俊奏云。二十九日。正月初二日。凡敵殺傷相當。又得二十八日奏。及差人賫到二級。上命辛企宗以兵一千赴明。策應。又出手詔趣杜克。趙立。劉位。激勵使戰。以為後圖。皆親書示宰執。乃遣之。而辛企宗不行。七日。周望奏常州有紅抹額賊眾犯外城。知州事周杞守子城。以拒賊。赤心隊劉晏出戰。敗之。又言知秀州程俱。率官吏棄城。保華亭縣。又探建康人馬皆焚糧草。收金銀。稍渡江北去。自稱李成人馬云。八日。張思正奏云。張俊出兵擊退虜騎。思正與劉洪道。李質分兵追躡。九日。張俊已自台州趨行在。意恐金人小劔。濟師而來。力不能拒。爾前此屢奏求海舟。朝廷報以方聚集遣行。欲其且留明州。既得此奏。甚以為憂。又慮李鄴已迎降虜人。以越為巢穴。其經營未已也。十日。郭仲荀責授汝州團練副使。廣州安置。以擅離越州。及妄支散錢帛。又夜過行在。不乞朝見等罪也。十二日。勝康遣使臣奏隆祐一行已到。

虞州前此得信州探報云十七日到吉州又云二十一日有人馬至吉州東岸知州楊淵棄城走朝廷深慮胡人追躡然本謀南昌之行意謂虜人未必侵犯雖離建康日得密旨今緩急取太后聖旨便宜以行後至平江議者乃云自蘄黃渡江陸行二百餘里可抵南昌朝廷始以為憂遂命劉光世自淮南移軍于江州以為南昌屏蔽既至而軍中月費十三萬緡知州事權邦彥以用度不足告於朝廷命洪州三省密院應副至十一月中權邦彥乃奏言得東平府故吏卒報其父已身亡遂解官持服朝廷雖遽命起復而邦彥已離郡去及胡騎渡江光世乃言初謂蘄黃間賊寇遣兵迎擊既知其為金人遂回軍隆祐以初八日行胡騎以十四日到城下於是知州王子猷以下皆走胡騎入犯撫州執知州事王仲山以其子權知州事令根括境內金銀走洪州送納虜怒其少撫州四縣不及洪州一縣乃知信州陳机探報也十三日劉洪道奏金人再犯境上遣兵拒之及陳彥在餘姚屢獲首級及稱李鄴並無關報文字然台州探報越州並於散把隘人兵及管待虜人與之飲燕又命父老僧道赴杭州知其必迎降矣十四日張俊自台州來執胡人一名至行在戮之知邵武軍張翥奏有光澤縣弓手同胡人一騎至軍稱有大軍千餘人繼至已行斬首於是福建

諸州皆震恐知福州林適奏乞遣兵防守又自言老病不任事乃命集英殿修撰程邁代之十五日胡人再犯餘姚朝廷欲遣張公裕以海舟數千載兵抵錢塘江下燒燬胡人所集舟船衆以公裕素不知兵又慮海舟反為胡人所得皆以為不可十六日兩雷發聲十七日劉洪道人兵以十三日一便水陸並進直至城下洪道與張思正皆引兵出天童山先是李質已擅趨台州朝廷方見三官令還四明已無及矣又聞南昌胡騎入潭州而洪撫建昌之間稍稍引去建昌通判晁公邁申先因出城招集民兵以軍事付訓練官承信郎蔡延世凡八日而回延世拒而不納十八日移舟離章安鎮始張俊既移軍朝廷議分遣其將領率兵應援明州上不欲遣乃止謂此時駐蹕之後資以彈壓蓋行在諸軍並皆精甲全裝稍整齊爾又批令劉洪道等皆退避其鋒然議者皆慮明既失守則海道可虞而行在必不敢安也十九日晚雷雨又作二十日泊青澳門二十一日泊温州港口二十二日余被旨奉使江湖問安隆祐官自後不復記錄聞行在已駐温州矣已上李所記云明清又聞是歲越州郡守李鄴既以城降通判曾恚罵賊不屈而死全家被害獨乳婢抱一嬰兒獲免有宣教郎知餘姚縣李頴士者募鄉兵數千列其旗幟以捍拒之賊既不知其地勢又不測

兵之多寡。為之小却。彷徨不敢進者一晝夜。遂是大駕得以自定。海登舟航海。事平。詔特贈志直祕閣。命其弟愆子密以官。穎士遷兩官。擢通判州事。時又有宋輝者。為大漕。治事秀州之華亭縣。聞龍艘已涉巨浸。即運米十萬石。以數大船轉海。訪尋六飛所向。至章安鎮。而與御舟遇。百司正闕。饋食。賴此遂濟。多事之際。若二人。輝與穎士者。亦可謂奇績。而志之忠節。皆恨世人未多知之。穎士字茂實。福州人。登進士第。紹興中。為刑部郎中。輝字元實。敏求之孫。後為祕閣修撰。知臨安府。志南豐先生之孫。密即所逃嬰兒也。嘗知南安軍。揮塵後錄宣和中。燕諸王于禁中。高宗以困於酒。倦甚。小愒幄次。徽宗忽詢康王何往。呼左右告以故。徽宗幸其所視之。甫入。即返。驚愕默然。內侍請于上。上云。適揭簾之次。但見金龍大餘蜿蜒榻上。不欲呼之。所以坐出。歎息久之云。此天命也。遂是異待焉。趙士鑑老云。高宗嘗語呂頤浩云。朕在宮中。每天下奏案至。莫不熟閱再三。求其生路。有至夜分。卿可以此意喻刑寺官。凡於治獄。切當留心。勿草草。頤浩再拜贊。即以上旨喻之。姜女禮處恭云。曹功顯勛語明清云。昨從徽宗北狩。至燕山。逃歸。顯仁令奏高宗曰。上為康王。再使虜中。欲就鞍時。二后泊宮人送至廳前。有小婢招兒者。見四金甲人。狀貌雄偉。各執方劍。擁衛上體。

婢指示。眾雖不見。然莫不畏肅。后即悟曰。我事四聖。香火甚謹。必其陰助。今陷虜中。愈當虔事。自後夜深。必四十拜止。更令奏上。且嚴崇奉。以答景貺。高宗後駐蹕臨安。即詔於西湖建觀象設以祀。甚為壯麗。又云。后未知上即位。嘗用象戲。局子棗以黃羅書康王字貼於將上。焚香禱曰。今三十子俱擲於局。若康王字入九宮者。必得天位。一擲。其將子果入九宮。他子皆不近。后以手加額。喜甚。即具奏。徽廟大喜。復謂后曰。瑞符昭應。異常可無慮矣。王廷秀字穎彥。四明人。靖康初。以李恭發薦為臺屬。高宗即位。擢登言路。著書號閱世錄。其中一條載明受之變。甚備。蓋其所目擊。是時宰輔如朱呂二張。俱有記錄。矜夸復辟之功。悉皆不同。有如聚訟。不若穎彥之明白無偏。今錄于左。建炎己酉三月一日。宣麻以朱勝非為相。罷葉夢得左丞。王淵自平江來。上殿對畢。除簽書樞密院。既受命之次日。有旨。只依兩府恩例。不預省事。四日。廷秀入對。以初除察官。未經上殿。故也。五日。入起居畢。復宣麻殿門。即聞外變。宮門已閉。廷秀與察官林之平同宿。留於翰林院前。翰林院以臨安府使院為之。久之。入學士直舍。李邴為內翰。從官王絢。孫覲。都司葉份。亦在。少頃。聞宣宰執云。苗劉兵殺內侍。且欲必得康履。魯擇藍珪。有一闍走入學士院。自刎不死。卧前廁。聞駕御。

樓軍士山呼。康履走入內中。步軍太尉吳湛尋捕得於小亭。仰塵上。擒以付苗劉。即時斬首標之。宣諭以內侍有過當為治之。二將與轉官其下對。我等若欲轉官。祇用牽兩疋馬與內官。何必來此。已而復召侍從百官。廷秀從諸公上樓。見上座金漆椅子。宰執從官并三衙衛士百官皆侍立。左右樓下兵幾千數。苗劉與數人甲冑居前。出不遜語。謂上不當即大位。將來淵聖皇帝歸來。不知何以處。此語乃陳東應天上書中有之。故二兇挾以脅制。欲上為內禪之事。宰相從百官出門下。委曲喻之。使退。不從。左右言請太后出處分。於是上遣人請太后。久之。太后乘黑竹輿。從四老官監至樓上。命儀鸞司設帷幄。垂簾置坐。不能具。止坐輿中。傳旨下諭。亦不肯從。又肩輿至門下。太后在輿中。親宣諭。且以上仁孝。曉夕思念二聖。勸兵選將。欲復讎雪耻。太尉等皆名家。不須如此。二兇抗言。必欲太后輔太子聽政。太后曰。以太平時。此事猶不易。況今強敵在外。太子幼小。決不可行。不得已。當與皇帝同聽政。委喻久之。堅不從。太后復上樓。上白事於竹輿前。言事無可奈何。須禪位。太后未允。又令與百官同議。自朱勝非以下皆不敢出言。獨有一著緋官負進前曰。陛下當從三軍之言。眾甚駭之。時有杭州通判章誼面折之曰。如何從三軍之言。其人逡巡無語。上亦怪而問。

其姓名自陳云。朝散郎主管瀾西安撫司機宜文字時希孟。上顧翰林學士李邴。令草詔。邴乞上御札。取紙筆就椅子上寫詔。以金人強橫。當退避云云。寫畢。令持詔下宣示。二兇兵退。上亦徒步歸內中。時已未刻。百官方出。見道傍卧尸枕藉。皆內侍也。是日凡宦者非入直在內。皆為其所殺。而財物盡劫取。明日太后垂簾。朱勝非辭疾不出。太后使人宣召。又命執政親往府中召致之。太后復遣老官監宣喻。乃出。自是二兇更至朝堂。道間傳呼都統太尉。從以強虜。兇焰可畏。行者開道避之。迫脅要索。惟意所欲。初一劄子凡十事。如改元。請上徙外宮之類。宰執委曲調護。其中有甚不可行者。八日。遂改元。明受。張浚自平江遣士人馮輻來議。欲以上為元帥。領兵。移書痛責二兇。二兇諷朝廷以尚書召張浚。不從。又拜韓世忠節度使。除張浚秦鳳路總管使。領兵歸。不從。復降麻建節度使。知秦州。遣人責麻制授二人。二人械其使。送平江獄。又欲起兩浙新舊弓手之半。赴行在。廷秀入。疏止之。時呂頤浩。張俊。韓世忠。劉光世。張俊。同議引兵問罪。復辟。又加康允之待制。劉蒙直閣。吳說。金部郎中。兼提舉市舶。小人鼓動。乘時求差遣。而得之者甚多。有范仲熊者。轉運判官。冲之子。祖禹之孫也。嘗陷虜。逃歸。日與二兇交遊。其賓客王世修。張遠。王鈞甫。馬柔吉。皆締暱。五日。

之事仲熊實與聞至是二兇諷顏岐薦上殿除省郎言凡臺諫章疏乞露姓名行下其意蓋欲言者懼二兇不敢斥言其罪十六日上出睿聖宮以顯忠寺為之也內人六十四人有與過二兇遣人偵伺恐匿內侍故也擒到內官魯擇太后降旨貶嶺外既行一程復追回斬之亦二兇意也又欲以其親兵代禁衛守睿聖宮挾天子幸徽宣并浙東宰相曲折諭以禍福且以忠義歸之以安其反側願浩等領兵以嘉禾二十五日召百官聽詔書大意云狄人以睿聖不當即位兵禍連年今當降位為皇太弟兵馬大元帥嗣君為皇太姪皇太后臨朝聽政退避大位務在息兵在庭愕然廷秀與中司欲留班論列以臺諫唯廷秀與鄭穀二人遂不果就退睿聖宮立班久之上御坐起居罷宰執上殿奏事議論幾數刻傳宣令百官先退仍云已會得復聞上語宰執云若此傳之後世豈不貽笑哉次日早鄭穀入對且言既降位號則乘輿服御亦皆降殺豈將易赭服紫耶當夜歸亦作奏狀令吏寫亭午方畢即進入未後太后宣召同中丞對簾前宰執皆在鄭穀對乞次召廷秀太后云今日之事且因臣下有文字宰執商量且欲睿聖皇帝總領兵馬耳廷秀對曰臣不知其他但人君位號豈容降改聞之天下孰不懷疑雖前世衰亂分裂之時固未有旬日之間易二君一

朝降兩朝位號也太后乃云必是殿院不曾見諸人文字相公可同殿院往都堂看前後文字便見本末既退即隨兩府至都堂朱勝非顏岐王孝迪路允迪張澂皆在坐朱相自青囊取文字數紙次第以示最上乃特服人奉議郎宋邴書次即張俊奏言睿聖皇帝當為天下兵馬大元帥下數紙不暇詳觀其間亦有士人上書者意皆畧同廷秀語朱相云此事朝廷當有善後計但天子位號欲降於理未安廷秀既當言責不敢嘿嘿章疏言語狂直朱曰公為言官自當言責蓋章疏中有及大臣者復語諸公曰昨日之詔不可布于外必召變而張徵云若以五日時事勢豈爭此名位耶張欲行詔出廷秀請少緩明日鄭穀入章引舜禪禹而親征有苗唐睿宗上畏天戒禪位太子而大事自決用其議遂寢二十五日詔書鄭穀遂遷西樞以中書舍人張守為中丞願浩等會兵剋日將至兇徒氣挫乃使王世修與宰執議天子復正往來數日四月一日辰時降旨召百官睿聖宮起居門外侍班次見宰執遣吏來問戶部尚書孫覿借金帶至班次忽有戎裝紫衫帶子也官負綴從官班問之乃是王世修方除工部侍郎賜袍帶未至先令綴班方悟假帶之繇蓋自渡江後宰執從官並繫犀帶今此異數用安反側世修王能甫之姪前此選人知鄭州滎澤縣虜兵偶不

曾到而是邑全李綱特與改官遂為苗傅幕賓午後上出百官起居畢即上馬百官捲班先行迎於內東閣外杭州太守常視事在大廳之北至是世修具袍帶明日有旨正朝以苗傅為淮西制置使劉正彥副之使其避張韓之兵別路而往又頒制賜鐵券帶礪之誓三日聞韓將前軍至臨平為二兇設伏掩殺四日夜二兇拔寨道餘杭門出轉龍山繇富陽而去明日韓將劉兵皆入以張俊簽書樞密願浩右僕射朱勝非知洪州張浚知江州韓將遣人擒王世修鞠始謀并拘其妻子有旨令劉光世處斷晚有文字至臺申差察官就審實朝廷亦恐諸將鍛鍊非實情也是時察官唯陳戢獨員將臺吏并司獄至光世寨取王世修嘗與二兇語闔官恣橫而劉尤嫉之上自揚州奔播過浙西道吳江左右宦者以射鴨為樂至杭州日群闖游湖山世修以劄子示正彥憤然曰公甚忠義要須與公協力同去此輩俄又聞王淵為樞密愈不平苗劉乃與世修等謀先斬王淵然後殺內侍議已定初四日部分兵馬且使人語淵云臨安縣界有強盜欲出擒捕五日早令世修伏兵於城西橋下俟淵過即猝下馬斬之繼遣人圍康履家分兵捕內官凡無鬚者皆殺然後領兵伏闕請罪脅天子禪位此皆始謀實情依所招具奏明日戮之於市吳湛以輔二兇領中軍寨於官

門前申請除宰執侍從餘人悉於中軍寨門下馬使悍卒持挺誰何至歐擊從人損壞輿轎廷秀兩章引皇城司格令并律文闡入法理會僅以章行而悍將復匿之而不出廷秀以臺中被受榜於皇城司前軍士方少戰至是湛亦戮馬并貶王元左言皆殿帥以當日坐視二兇之恃不畧誰何故也六日廷秀對疏言錢塘非可居當圖建康為暫都計上亦知此非處一章言王世修等及康允之劉蒙吳說范仲熊讀至論仲熊事上甚怪之乃曰范仲熊莫不如是對曰臣不知其他但在宣和末進用實出梁師成門下又入文字言希孟上初怒甚便欲梟者宰執言此當自有論列故廷秀章上迺貸希孟流嶺南而賞詣兩官穎彥又記高宗六龍幸海事云己酉十一月駕幸會稽覘者報虜人分兵渡江一自采石入建康一自黃州過興國軍渡采石者杜充兵要擊於中流小捷奏乞上請親征二十五日駕起會稽至錢清聞虜人十九日已渡大江二十六日駕自錢清回明州避虜十二月七日至明侍從百官皆散唯宰執從行留張俊軍于越辛企宗領中軍李質領禁衛護從士卒不滿數千泉州海船皆至廟堂即為航海計衛兵不欲行九日遂群噪欲狙擊宰執十一日以張思正兵索城中捕亂者戮其為首數人餘分隸五軍以御營使司參議官劉洪道

知明州與張汝舟兩易。十六日早，上自府衙出東渡門登舟。十八日，御舟泊定海縣。二十日，參政范宗尹入城探報。十六日，已陷杭州。大肆焚戮。宗尹即回，從駕張俊以所領軍自越來明。知越州李鄴遣兵邀虜於浙江。三捷既而，衆寡不敵。鄴遣人賞書投拜，虜人按兵入越。俊兵在明，乘賊先而恣掠鹵。時城中人家少，遂出城以清野為名。環城三十里，居民皆遭其焚劫。或以金帛牛酒餉之，幸免。與紛爭，則殺之。有城南湯家子先毆其卒，卒走。嘯衆來，痛擊垂死，積稻稗蔽之。兵去，人或救之者，尚活。而虜躄已集，裂少刻而死。二十七日，虜引兵自餘姚道藍溪入黃劉車廐，直抵湖塘。分屯於湖中田舍。二十八日，俊引兵禦之。小却。於是虜人自城下呼，請遣人來寨中議事。明日，俊遣姓徐人抵虜寨，虜囚釋甲與語，欲如越。官吏投拜，拒之。自後相持不敢動。正月二日，午間，西風虜兵乘之，扣西門。時俊與劉洪道坐城樓上，遣兵掩擊，擒斃二酋。虜奔北，墮田間，或墜水。勢當追而鏖敗之。而俊亟令收兵，要之得失畧相當，僅能却之而已。且張皇奏凱而策勲。其後肆青文云：鄞水勦絕其大半，蓋謂是也。其夜虜兵拔寨西去。俊遣人候伺。知虜人駐餘杭，治攻具，請於臨安之大酋，益兵將復來。俊托以上旨召扈從。八月，盡起其衆入台，行甚速。而李質亦以班直繼行。思正千餘徒

屯江東。而質思正，洪道猶過從夜飯城中，居民出者已十七八。有士人率衆叩洪道馬首，願留以禦賊。洪道給曰：予當數剋敵而勝，若等事無慮。復下令：民遷城外者，得取其家之什物儲峙。於是舟入城者數千隻。洪道擇其大者，留供官屬。取公使高麗兩庫金銀器皿，輾壓之，而實於麓輿。帑藏儲糧載之海舶。而洪道所將精卒僅千人，橫肆乘亂剽掠。州人怨之。十三夜，洪道微服出城，既過東岸，恐人追襲，乃使盡揭浮橋之版。居人扶攜，以絙索而渡。卒復邀奪其所賣，擁排遏抑，墜水者數千。哀號震天地。城中惟崇節作院廂軍，與無賴惡少僅千人，以監甲伏使臣并監酒務李木者將之。凡此皆欲僥倖賊不至，掠取公私之物者。十四日，虜果復至，營廣德湖舊寨。前遣老弱婦女運瓦礫填塹。十五夜，植砲架十餘對西門。十六日，以數砲碎城樓守者奔散。奏東南縋城而出，或浮木渡江，生死相半。而奔起村落者，與賊遇。由是遍州之境，深山窮谷，平時人跡不到處，皆虜人搜剔叢榛，如探巢取卵，殺掠不可勝數。既而破定海，以舟絕洋，劫昌國縣。復欲攻象山縣。至碇頭，風電大作。俗謂碇海道最險處也。遂回。大率自正月十六日，陷明州。至二月三日方去。其酋長請於長安之大酋，大酋乃四太子云。搜山檢海已畢。其明州取指揮報云：依揚州例，故自二月初，遣人四

面放火。城中惟東南角數佛寺與僻巷居民偶得存。虜人既去，城外群小以船盜取公私錢物。而村落兇頑殺人攘劫毒甚於虜。州縣官逃避未遇。有蔣安義、張鼎者受虜人偽命，蔣為安撫，張為通判。且授安義以兩浙運司印一紐。安義遂領州事，繫街出榜，自命其子知鄞縣。敵不逞，以攘取。十二日，慈溪縣令林叔豹領鄉兵入城，見安義奪其印，遺虜人。十二人在開元寺病不前者，叔豹誅之。十六日，通判將賡自象山郡官稍稍繼至。洪道亦自台回，至奉化縣，言已受命，制置浙東。且椿糧料兵，遂之越。不知傅崧卿前此已收復也。洪道留奉化縣，比向日誅求益甚，而所將精卒暴橫而肆。邑人蔣璉，兇悍人也。前此群聚防守，幸虜兵不至，自以為功。方肆強梁，會洪道卒，而有毆其黨者，一夕敵引數千人圍岳林寺，欲縱火而殺。毆人之卒，不得已，取其卒杖流之。乃定洪道既入城，與張思正縱其麾下，斫民居窖藏，逃遁之家，偶脫死餒餓甚矣。歸故址，取其藏給朝夕。則群卒強奪之。雖焚餘椽楹藩籬，可為薪者，人不得有。公遣數百輩持長竿大鈎，撈攬河陂池井間，謂之闌遺錢物，輸公十不一二。洪道復苛配強斂，併得四萬緡，獻之行朝，欲蒙失守之罪。三月十二日，乘輿自溫航海至明，時州邑已焚蕩，舟由城外徑之越。因言者罷洪道，以向子志知明州。穎彥家居四明。

之海濱，宜知其詳。建炎己酉，高宗躡于建康，閩中擒苗傅，劉正彥獻俘于朝，檻車幾百兩，先付之大理獄，將盡尸諸市。子棠詣對，以陳云：在律俱當誅死，然其中婦女有願買及鹵掠以從者，倘殺之，未免無辜。願賜哀矜。上矍然曰：卿言極是。朕思慮之所不到，即詔除二兇妻子之外，餘皆釋放，歡呼而出。揮麈第三錄：亮篡位之後，偶因本朝遣使，至其闕庭，有畏讜者，遂有輕我之心。即謀大舉，僉刷以壯人為兵，欲以百萬南攻，止得六十七萬。以二十七萬侵淮東，敵劉信叔亮以四十萬自隨，由淮西來，與王權相遇，而王權之眾不能當。在和州對壘，權盡遣渡船過南岸，與某眾誓云：國家養汝輩許時，政要今日以死上報。眾皆唯唯。兩軍堅壁不動，權以二三腹心自隨，手執諸軍旗號，戒諭諸將云：不可妄動，且看虜軍有陣脚不固不肅者，看吾舉逐軍旗號，先舉動，虜軍數重之內，有紫傘往來傳呼者，莫知其意，虜軍先來犯陣，遇大雨，遂退，復駐軍于舊寨，無一不肅。諸將遂語權云：虜將如此，我軍如何可戰？權云：諸公不可說此語。今日正當報國之時，宜盡死于此。不可有一人異議。諸將云：太尉欲與諸軍死此邦，將甚軍馬與國家保守江面，權悟其言，遂言當從諸人議，往南岸叫船渡軍馬，還與國家保江。却自往朝廷請罪，又與諸將計算軍馬渡江，有殿

後者必為虜騎所追。合損折一軍半人馬。又要一將殿後。統制官時俊云。願為殿後。保全軍馬過江。眾服其勇。王琪是為護聖馬軍統制。亦同行云。所部軍馬。乃主上親隨太尉。不可失却也。一人一騎。遂令護聖馬軍先渡。諸軍次第而濟。虜騎果下馬來襲。時俊牌手當之。幸所失不致如算之數。諸軍遂就采石。各上戰艦。以備虜人。權為樞密行府。押詣朝廷。竄于海外。逆亮築臺江岸。刑白馬祭天。自執紅旗麾諸軍渡江。行至中流。為采石戰艦迎敵。時俊在舟中。令軍士以寸札弩射。虜人赴水者多。盡皆退走。亮知江岸有備。遂全軍過揚州。軍士奏愷未及登岸。虞丞相允文以參贊軍事。偶至采石。遂與王琪報捷于朝。虞自中書舍人。除兵部尚書。自此遂東。春知琪除正任觀察。使諸將在江中獲捷者。亦皆次第而遷。水軍統制盛新。功多而獲賞最輕。壹鬱而死。建康采石軍士。至今憐之。次年春初。明清從外舅起帥合肥。道出采石。親見將士言之。直書其語。不復潤色。以文云。揮塵餘話。建炎己酉。以葉夢少蘊為左丞。纔十四日。而為言者所攻而罷。其自記奏對聖語。備列于後。一日進呈。知婺州蘇遲。奏乞減年額上供羅。聖訓問祖宗額幾何。臣等對。皇祐編勅一萬匹。問今數幾何。臣等指蘇遲奏言。平羅婺羅花羅三等。共五萬八千七百九十七匹。聖訓驚曰。苦哉。民何

以堪。臣等奏。建炎赦書。諸宗寧以後增添上供過數。非祖宗舊制。自合盡罷。今遲奏乞減一半。聖訓曰。與盡依皇祐法。臣等奏。今用度視祖宗時不同。却恐減太多。用度不足。即不免再拋買。或致失信。欲且與減二萬疋。并八千有零數。臣等奏。陛下至誠卹民。可謂周盡。聖訓復云。如此好事。利益於民。一日且做得一件。一年亦有三百六十件。臣等退。御筆即從中出曰。訪聞婺州上供羅舊數。不過一萬疋。熙寧以後。積漸增添。幾至伍倍。近歲無本錢。皆出科配。久為民病。深可矜恤。今後可每年與減貳萬八千匹。并零數者。為永法。仍令本州及轉運司。每年那融應副本錢足備。臣等即施行。車駕初至臨安府。霖雨不止。一日臣等奏事畢。因言州治屋宇不多。六宮居必隘窄。且東南春夏之交。多雨蒸潤。非京師比。聖訓曰。亦不覺窄。但卑濕爾。然自過江。百官六軍皆失所。朕何敢獨求安。至今寢處。尚在堂外。嘗族將士官局。各得所居。遷徙之人。稍有所歸。朕方敢遷入寢。臣等皆言。聖心如此。人情孰不感動。車駕始至臨安府。手詔郎官以上。悉皆許薦人材。蓋特恩也。一日進呈侍從官等奏狀。聖訓諭臣等曰。今次所薦人材。不比已前。當須擇其可取者。便擢用之。乃命並召赴都堂審察。翌日復命。臣等曰。郎官等所薦士。不若便令登對。朕當親自延見之。早朝退。遍閱諸

處章奏未嘗閑。今後進膳罷。今後殿引見。及晚朝前。皆可引三班。庶得款曲。臣等奏。但恐上勞聖躬。若陛下不倦。接見疎遠。搜訪賢能。天下幸甚。於是再批旨行下。一日。初進對。聖訓首言陳東。歐陽徹。可贈一官。并與子。或弟一人。恩澤。始罪東等。出於倉猝。終是以言責人。朕甚悔之。今方降詔。使士庶皆得言事。當使中外。皆知此意。臣等即奉詔言甚善。聖訓復曰。馬伸前此責去。亦非罪。可召還。或曰。聞伸已死。聖訓曰。不問其死。但朝廷召之。以示不以前責為罪之意。乃問伸自何官責。臣等皆曰。自衛尉少卿。聖訓可復召為衛尉少卿。臣等奉詔而退。東等於是皆贈官。及與子。或弟。恩澤一人。并詔所居。優卹其家。進呈。湖州民王永從。進錢五十萬緡。佐國用。臣等言。戶部財用稍集。亦不至甚闕。聖訓曰。如此即安用。徒有取民之名。却之。或曰。已納其伍萬緡矣。今却之。則前後異同。聖訓曰。既不闕用。可併前已納還之。仍詔今後富民。不許陳獻。臣等皆言。聖慮及此。東南之民間風。當益感悅。一日。聖訓諭臣等言。過江器械。皆散亡。甲所失尤多。朕每躬探甲冑。閱武於宮中。以勵衛士。乃知舊所造甲。有未盡善。如披膊。皆用鐵。臂肘。幾不可引。以當冑。緩急如何。屈伸。今皆親自裁定。損益。與舊不同。極便於施行。今兩浙路諸州。分造甲五千副。一以新樣為之。臣等皆言。陛下

留意武事。前所未講。蓋經聖慮。此前史所以稱漢宣帝器械技巧。皆精其能。朝退。內出新樣甲一副。示臣等。舊轉肘鐵。葉處。皆易以皮。屈伸無不利。便。他皆類此。其後陳東。歐陽徹。俱贈祕撰。各有官其二子。仍賜田千頃。朱子語類。個問趙忠獻。張魏公當國。魏公欲戰。忠簡欲不戰。忠簡以為劉豫机上肉耳。然豫挾虜人以為重。今且得豫遮蔽虜人。我之被禍猶小。若取劉豫。則我獨當虜人難矣。魏公不然之。必欲戰。二策孰是。先生曰。忠簡非是。殺得劉豫了。又却抵當虜人。有何不可。又云。劉豫亦未便是机上肉。在若。以趙之才。恐也。當未得那机上肉。在他。亦未會被你殺得。只是胡說。若真个殺得劉豫。則我之勢益強。虜人自畏矣。何難當之。有虜豺狼大羊也。見威則畏。見善則愈肆欺侮。若自家真个曾勝劉豫。殺得一兩番贏。他便怕矣。靖康以後。自家只管怕他。與之和。所以他愈肆欺侮。若自家真个能勝劉豫。他安得不懼。虜禽獸耳。豈可以柔服也。嘗見征蒙記。李成之子某。從兀木征蒙國。因記征蒙時事云。兀木在甚處。淮上二士人說之曰。今韓世忠渡江。遺棄糧草甚多。若我急往收取。資之以取江南。必可得也。兀木然其言。遂急來淮上。則空無所有。蓋韓已先般輜重糧草歸。而後抽軍回也。彷徨淮上。正未有策。而糧草已竭。窘不可言。先已敗於劉錡。錡在順昌。

府扼其前進退不可遂遣使請和兀朮謂其下曰今南朝幸而欲和即大幸不然即送死耳無策可為也這下又不令知狼狽如是若知之以偏師臨之無遺類矣是時雖稍勝然高宗終畏之欲和因其使來喜甚遂遣使報之欲和兀朮大喜遂得還是兀朮不可望和自以為必死其遣使也蓋亦謾試此間耳可惜此機會所以後來也怕一向欲和又云劉信叔在順昌府一勝是時劉以孤軍在順昌兀朮來伐諸將皆欲走信叔曰不可我若走則虜人必前拒我襲在後必無遺類若幸而得至江則諸將盡扼江上責我以擅棄歸之罪亦必盡殺我決無可生之理不若堅守此城與虜人決勝負庶幾死中可以求生也某嘗說廝殺無巧妙只是死中求生兩軍相柱一邊立得脚住不退即贏矣須是死中求生方勝也遂據城與虜人戰大敗虜人兀朮由是畏怯若非錡順昌一勝兀朮亦未必便致狼狽如此之甚信叔本將家子喜讀書能詩詩極佳善寫字後來當完顏亮時已自老病緣其姪劉玘先戰敗遂至於敗 憫因問當初高宗若必不肯和乘國勢稍振必成功曰也未知如何蓋將驕惰不堪用 憫問如張韓劉岳之徒富貴已極如何責他死了宜其不可用若論數將之才則岳飛為勝然飛亦橫只是他猶欲向前廝殺先生曰便是如此有才者又有些毛

病然亦上面人不能駕馭他若撞着周世宗蕭太祖那裏怕他駕馭起皆是名將緣上之舉措無以服其心所謂得罪於巨室者是夜因論為政不得罪於巨室語及此又問劉光世本無能然却軍心向他其裨將亦多有可用者先生云他本將家子云云張魏公撫師淮上督劉光世進軍是時虜人正大舉入寇光世恐懼遂背後懼趙忠簡公是時趙鼎為相折彥質為樞密折助之請樞密府遂命劉光世退軍魏公聞知大怒遂趕回劉光世出榜約束云如一人一馬渡江者皆斬光世遂不敢渡江便回淮上樞府一面令退軍而宣撫令進軍淮上然終退怯魏公既還朝遂力言光世巽懦不堪用罷之而命呂安老社董其軍及呂安為瓊等所殺降劉豫魏公由是得罪而趙忠簡復相趙既相遂復舉劉光世為將便是事都算成私意魏公已自罷得劉光世好了雖呂安老敗事然後舉能者而任之亦足矣何必須光世哉此皆趙之私意以某觀之必竟魏公去得光世是而趙所為非豈有虜人方入你却欲掉了去一邊令進軍一邊令退軍如何作事云云又言諸將驕橫張與韓較與高宗密故二人得全岳飛較踈高宗又忌之遂為秦所誅而韓世忠破膽矣只有韓世忠在大儀鎮募殺得虜人一陣好高宗初遣魏良臣往虜中講和令韓世忠退師渡江韓聞

魏將至。知其欲講和也。遂留之云。某方在此措置得畧好。正抵當得虜人住。大功垂成。而主乃令追還。何也。魏云。主上方與大金講和。以息兩國之民。恐邊將生事。故盟。故召公還。慎勿違上意。韓再三嘆息。以為可惜。又云。既上意如此。只得抽軍歸耳。遂命士卒束裝。即日為歸計。魏遂渡淮。兀木問以韓世忠已還否。魏答以某來時。韓世忠正治疊行。即日起離矣。兀木再三審之。知其然。遂稍弛備。世忠乘其懈。回軍奮擊之。兀木大敗。魏良臣皇恐無地。再三求哀云。實見韓將回。不知其紿已乃得免。問不能自強。則聽天所命。修德行仁。則天命在我。因說靖康之禍。云云。終始為講和所誤。虜人至城下攻城。猶說講和。及高宗渡江。亦只欲講和。問秦檜之所以力欲講和者。亦以高宗之意自欲和也。曰。然。是他知得虜人之意。是欲厭用兵也。當初自虜中來時。已知得虜人厭兵。故這裏迎合高宗之意。那個又投合虜人之意。虜人是時子女玉帛。已自充滿厭足。非復曩時長驅中原之銳矣。又被這邊殺一兩陣。怕了。兼虜之創業之主已死。他那邊兄弟自相屠戮。這邊兵勢亦稍稍強。所以他亦欲和。趙丞相亦自主和議。但爭河北數州。及不肯屈膝數項禮數。爾至秦丞相。便都不與爭。趙丞相是西人。人皆望其有所成就。不知他倒都不進前度。問中興賢相皆推趙

忠簡公何如。曰。看他做來做去。亦只是王茂洪規摹。當時廟論大槩亦主和議。按王庶云。免簽書和議文字劄。貼黃云。契勘臣前項所上章奏。及與

王倫議。實有妨嫌。今若不自陳稟。則又如趙鼎劉大中輩。首鼠兩端。於陛下國事何益。使當國久時。未必不出於和。但就和上。却須有些計較。如歲

幣稱呼疆土之類。不至一一聽命。如秦檜之樣。老草地和了。後來秦檜之沒意智。乃以不合沮撓和議為詞。貶之。却十分送个好題目與他。問趙好

處何如。曰。意思好。又孜孜汲引善類。但其行事。亦有不強人意處。如自平江。再都建康。張德遠極費調護。已自定疊了。只因鄺瓊叛去。德遠罷相。趙

公再入。憂虞過計。遂決還都。臨安之策。一夜起發。自是不復都金陵矣。問鄺瓊之叛。或云。因呂安老折辱之。不能安。遂生反心。如不親坐廳。但乘簾

露履。以受其參之類。恐無此等事。曰。此亦傳聞之過。又問當時皆歸罪魏公。以為不合罷劉光世。故有此變。曰。光世在當時。貪財好色。無與為比。軍

政極是弛壞。罷之未為不是。但分付得他兵馬無着落。又云。此事似不偶。然。如虜人寇虐。劉豫不臣。但無人敢問着他。至此。屯重兵淮上。方謀大舉。

以伐劉豫。忽然有此一段踈脫。遂止。又云。如呂安老才氣儘自過人。觀其議論亦甚精確。問鄺瓊叛去之後。聞亦不得志于虜。曰。虜人後來亦用他

為將但初叛歸于劉豫。虜人却疑豫擁兵大眾。或疑與我為內應。遂有廢豫之謀。鄺瓊叛于淮西。實紹興七年秋。戊辰也。瓊既降劉豫。金人憂其難制。遂廢偽齊。其詔有云。勿謂奪踐田之牛。其罰則不能為托子之友。非棄而之。此天亦滅齊豫也。豈偶然哉。問靖康之禍。若得如前輩之賢者一二。人莫可主張否。曰。也難主張。胡文定謂龜山云。使當時若早用其言。也須救得一半。他這說得極公道。道夫天下不可謂之無人才。如靖康建炎間。未論士大夫。只如盜賊中。是有多少人。宗澤在東京。收拾得諸路豪傑甚多。力請車駕至京。以圖恢復。只緣汪黃一力沮撓。後既無糧食供應。澤又死。遂散而為盜。非其本心。自是當時不曾收拾得他。致為飢寒所迫。以苟旦夕之命。後來諸將立功名者。往往皆是此時招降底人。所以成湯說萬方有罪。在予一人。聖人見得意。直是如此。按黃卓錄有詳畧。今附云。因言靖康紹興間事曰。天下不可謂之無人才。如高宗初興天下。多少人才。自是高宗不能盡舉而用之。未說士大夫。只盜賊中是有幾介人才。朝廷既不能用。皆散而為盜賊。可惜可惜。宗澤在東京。然招收得諸路豪傑盜賊。力請高宗還都汴。以圖恢復。被汪黃讒譖。一面放散了。皆去而為盜賊。當初高宗能聽宗澤李伯紀輩。須有少進步處。所以古人云。萬方有罪。在

予一人。怪他不得。你既不能用他。又無糧食與他喫。教他如何得其勢。只得散為群盜。以苟旦夕之命而已。其中有多少人材。可惜可惜。問今日事。因及石子重。是以其官召者。時為福州撫幹。因史真翁薦。被召。如廟堂不肯。休湏着去。先生曰。雖是如此。然亦濟得甚事。因舉孟子言。或遠或近。或去或不去。歸察其身而已。又舉了翁云。在彼者是舉爾所知。在我者是為仁由己。遂言靖康初。張邦昌僭位。呂舜徒為門下侍郎。當時有言他人不足惜。只舜徒可惜者。胡文定記其事云。舜徒雖為邦昌官。却能勸邦昌收偽赦。迎太后垂簾。皆其力也。其人云。終是難分雪。文定記此。只到終是難分雪處便住。更無它語。問只如狄梁公在武后時。當時若無梁公。更害事。曰。梁公只是薦得張柬之數人。它已先死。如梁公為周朝相。舜徒為邦昌官。皆不可以訊。伊川論平勃。謂當以王陵為正是也。如舜徒輩。一生踐履。適遭變故。不幸有此事。今人合下便如此。却不得。雍牖閑評。余嘗謂高宗乃太祖之後身也。曲洎舊聞載五代間。有一狂僧謂人曰。汝等望太平。須待定光佛出世。既而太祖即位。當時之人。莫不以為定光佛。至丙午年春。有宗室姓趙。居許下。忽夢梵僧告曰。世且亂。定光佛再出世矣。子有難。當日誦千聲。可免。是年高宗即位。則知二帝皆定光佛無疑。而泊宅編又載

猪頭和尚為定光佛。而太祖屬猪。高宗亦屬猪。已云異矣。余家宣政間。以先大父為郎。曹方留京師。聞高宗聖貌天材。種種過人。遠甚。人皆以小太祖目之。又况太宗在周朝為歸德軍節度使。後遂改歸德軍為應天府。即南京也。高宗亦即位於南京。以至太祖上仙之歲。在亥月。高宗亦以亥月上仙。每事皆同如此。故余獨謂高宗誠太祖之後身焉。嘗試思之。太祖之所以再出世者。殆天命也。其意深且遠矣。蓋自五代之君。多以幼冲而嗣位。其國祚往往皆絕無長久者。太祖既受禪。杜太后獨憂之。至其臨終。勸太祖兄弟相繼而立。令趙普作為誓書。置之甚詳。姑立太宗。未立太祖之子。魏王懼有五代之禍也。至太宗時。秦王已薨矣。後太宗復欲立太祖之後。為趙普者。乃云昔太祖已錯。陛下豈宜又錯。遂竟立真宗。迺遷至于高宗。前後八世。皆太宗之後。若高宗之子魏公尚在。則天下他日仍歸太宗之後矣。豈不重負於太祖乎。故天復令太祖再出世。為高宗者是矣。高宗皇子魏公已夭。不免別求聖嗣而立之。而壽皇乃秀王之子。正太祖直下諸孫。壽皇即位。天下於是復歸于太祖之後。使天不令太祖再出世。為高宗者。復求壽皇以立。其誰能以天下復歸于太祖之後。而謂高宗非太祖後身可乎。此事余每以為然。他人無有能知之者。獨恨身微言輕。不能一

詣朝廷顯明之。故閑識其事。使後世皆知本朝二帝事體如此。亦非偶然者耳。庚申。宋趙太祖以庚申受周禪。改元建隆。高宗中興。遷都臨安。亦以庚申建國。自秦漢以來。一百三十六帝。惟梁武帝得八十三歲。本朝高宗聖筭亦八十一。夫武帝壽數雖高。然未幾遭侯景之亂。狼狽而死。又何足貴邪。而高宗當天下承平之時。其年尚未及六十。乃以萬機之務。盡付之壽皇。方且陶冶聖性。恬養道真。所樂者。文章字畫。琴棋書畫而已。若其他子女之奉。聲色之娛。初未嘗留意。此所以五福俱全。獨過八旬之壽。自秦漢以來。一人而已。苟非胸中有大過人者。詎能至此乎。然則庸常之人。其可以情欲累其身哉。



考樂方知...
...
...
...
...

重錄總校官侍郎 臣秦鳴雷

學士 臣胡正蒙

分校官侍讀 臣呂 旻

書寫儒士 臣陳大吉

圈點監生 臣喬承華

臣歐陽卿

